


MABULU YA MASA YA KUTOBUKA

 Beto sambila. Mfumu, beto ke kwikila ntangu yayi. Beto ke kwikila na Mwana ya Nzambi, mpe, na nzila ya yayi, beto ke ndima Luzingu ya Kukonda nsuka na nzila ya Yandi. Ntangu yayi beto me vukana diaka, na manima ya midi yayi, to na nkokila yayi, samu na kisalu yankaka, beto ke tula kivuvu na Nge samu na Nsangu mpe yina Nge ke tuba na beto na nkokila yayi. Beto ke kwikila na Nge, Mfumu, mpe beto ke tula ntima na Nge. Mpe Nge tubaka, “Bayina nionso ke tula ntima na Mfumu ke vutula ngolo ya bawu; bawu ke pamuka mutindu mpongo.” Mpe beto ke sambila, Nzambi, ti Nge pesa beto Ngolo yina ke matisa beto, na nkokila yayi, mutindu beto ke tula ntima na Nge.

² Beto ke vutula na Nge matondo samu na bantu yayi, mpe samu na yina bawu zola tuba samu na Nge mpe yina bawu zola tuba samu na munu. Mu ke tonda Nge samu na yawu, Tata. Ba ke mayaka ya Nge. Mpe mu ke sambila, Nzambi, ti na nkokila yayi, Nge ke kukitalisa Nge mosi, na bawu, na mutindu ya bansatu ya bawu. Kana kele na bambevo awa, bika ti bawu beluka. Kana ntembe kele na mabanza ya muntu mosi awa, katula yawu, Mfumu. Mpe sala ti beto vwanda na Ntwala ya Nge mpe masakumunu ya Nge, samu beto ke na nsatu ya yawu, Mfumu. Nge ke yina me lunga samu na beto. Mpe, kukondwa Nge, beto lunga sala kima mosi ve.

³ Beto ke sambila ti Nge ke ndima matondo ya beto samu na nionso yina Nge salaka. Na Nkumbu ya Yesu Klisto beto ke tala na masakumunu ya Nge. Amen.

Beno lunga vwanda.

⁴ Mpe, mbote, ya ke kaka mwa nkokila ya Lumingu mosi ya mupepe ya kitoko, awa, kulutila mutindu yawu vwandaka na nkokila ya Lumingu me luta. Beto ke tonda mingi bampangi ya beto ya babakala yina salaka kisalu mbote-mbote samu beto vwanda na yayi awa. Mu zaba zole to tatu ya bawu. Mpangi Mike Egan, mutindu mu ke mona yandi kuna na manima, mpe mu. . . Mpangi Mike, mpe Mpangi Sothmann, Mpangi (mu ke banza) Roy Roberson, mpe Mpangi Wood, mpe bawu nionso, bawu vwandaka ke sala na ngolo nionso awa, mpe ke meka na kutula yawu samu beto vwanda na Nsangu yayi na ntangu yayi, to bubu yayi. Na yawu, beto ke vutula matondo mingi.

⁵ Ntangu yayi, na suka ya Lumingu ke kwisa, kana Mfumu kuzola, mu zola vwanda na lukutakanu ya bisambu samu na bambevo. Mpe beto ke kubika yawu samu na kusambidila bambevo, kana Mfumu kuzola.

⁶ Mu me mona ti, na suka yayi, kele na dibuki ya bamuswale awa. Mu me sambila samu na yawu. Mpe munu, na ntangu

beno vwandaka sambila mpe ke yimbila, mu sambilaka samu na bamuswale; mpe na yina kele na mingi diaka awa na nkokila yayi. Mpamba ve, beto—beto ke kwikila ti Nzambi ke belusaka bambevo. Bimbangi mingi ya nene ya bantu yina me beluka na kati ya beto, mpe na yinza ya muvimba, mpe beto ke vutula matondo samu na yawu.

7 Mpe mu banzaka, na Lumingu ke kwisa, na kutalaka ti mu ke vwanda awa ve samu na mwa ntangu fioti, mpe beto me tubila mingi malongi mpe Nsangu, ti yawu ke vwanda mbote kana beto lenda vwanda na bisambu ya bambevo, kusambidila samu na bambevo. Mpe beto ke na kivuvu ti Nzambi ke pesa beto ntangu ya mbote.

8 Ntangu yayi, mingi kati ya beno me tambula ba miles [ba kilometres] mingi na nkokila yayi. Na yina mu vwandaka tuba na bimvuka mingi kuna na Blue Boar Cafeteria, bubu yayi, sika wapi mu vwandaka na madia ya midi. Bantu mingi ya ntima ya mbote, mu pesaka bawu mbote mpe solulaka na bawu, bantu yina me kutanaka na bawu ntete ve, bayina ke kwisaka awa na yinzo—Nzambi. Mpe mu ke vutula matondo samu na bankundi ya mutindu yayi, mpe mu zola vutula matondo na konso muntu mpe mosi na mosi ya beno. Bayankaka kati ya bawu me buka bambuma, mpe me natila beto yawu. Mpe muntu mosi natilaka beto kantini ya sirop, to melasi, mu banza yawu vwandaka yina, mpe—mpe bima ya mutindu yina kaka. Beno zaba ve mbala yikwa yina ke simba munu na ntima. Mpe na suka, ntangu mu ke basika na yinzo, mbala yankaka . . .

9 Kuvwandaka na mpangi-bakala mosi yina vwandaka na mpasi na suka yina, yina vwandaka na bilele ve mpe nionso yina, yandi lombaka ti mu pesa yandi mwa bilele. Na kubasika, mu tutanaka na kantini ya bambuma ya sirop kuna. Mu tubaka, “Nge muntu nataka bambuma yayi ya mûre?”

10 Mpe yandi tubaka, “Ve, mu ke na kima ya kusala na yawu ve. Mu kwisaka awa na ntwala tongo kutana, mpe mu kutaka yawu awa.” Mpe yawu vwandaka mpangi ya munu ya mbote Mpangi Ruddell yina natilaka munu yawu. Mpe, na yawu, ya kieleka mu ke sepelaka na bima yayi.

11 Billy Paul zabisaka munu, na mwa ntangu fioti me luta, ti na kati ya dibuundu yayi na nkokila yayi, bawu kutikaka dikabu mosi, samu na munu. Mu—mu ke vutula na beno matondo samu na yawu. Mu ke zolaka ve ti beno sala mutindu yina. Mu—mu ke sepela kaka na bangolo ya beno nionso, mpe nionso yina, kasi yina ke na mfunu ve. Mpe, kasi, Mfumu kusakumuna beno. Beno zaba, beno zaba, Biblia ke tuba ti, “Nionso yina beno ke sala na bana yayi ya fioti, beno me sala yawu na Munu.”

12 Ntangu yayi, na ntangu me luta mu tubaka na beno, pwelele, na yina me tadila Nsangu. Mpe mu ke . . . Bantu yankaka lenda vwanda na dibanza ti—ti mu ke banza ti Yesu ke kwisa mbasi na

suka to na nkokila yayi. Mu ke banza mutindu yina. Ntangu yayi, mu ke tuba ve ti Yandi ke sala mutindu yina. Mpe, diaka, kana Yandi kwisa ve na sabala ke kwisa, mpe yawu lunga vwanda na mvula ke kwisa, yawu lunga vwanda na manima ya bamvula kumi. Mu zaba ve yinki ntangu Yandi ke kwisa. Kasi, kele na kima mosi mu zola. . . ntangu nionso beno banzaka yayi, beno vwanda ya kukubama na konso minuti to konso ngunga. Beno me mona? Ti, kana Yandi kwisa bubu yayi ve, Yandi lenda vwanda awa mbasi. Mpamba ve beno vwanda kaka na yina na mabanza ya beno, ti Yandi ke kwisa.

¹³ Mpe mu zaba ve yinki ntangu ke vwanda ngunga ya munu ya nsuka na zulu ya ntoto yayi, to samu na beto nionso. Mpe muntu mosi ve na kati ya beto kuzaba ntangu Yandi ke kwisa. Yandi zaba mpe ve, Yandi mosi, na Bandinga ya Yandi Mosi; Yandi tubaka, “Tata, kaka, zaba yinki ntangu Yandi ke kwisa; Mwana mpe kuzaba ve yinki ntangu Yandi ke kwisa.” Ya ke vwanda ntangu Nzambi ke tindila beto Yandi diaka. Kasi beto ke vingila Kwizulu ya Yandi. Mpe kana Yandi kwisa ve na nsungi ya munu, Yandi ke kwisa na yina ke kwisa; kana Yandi kwisa ve na yina, Yandi ke kwisa na yina yankaka. Kasi, munu mosi, mu ke mona ti ntangu me bikala diaka ve. Mu ke kaka. . . Samu na munu, ya lunga salama na konso muniti yina. Ntangu yayi, yina zola tuba ve. . . Yina zola tuba ve, ntangu yayi, ti beno ke mona zulu ke soba mpe nionso yina. . . Mu ke tubila Kwizulu yina ve. Mu ke tubila Enlevement.

¹⁴ Beno tala, Yandi sala Bakwizulu tatu. Yandi ke kwisa na bankumbu tatu ya mwana. Yandi ke kwisa na butatu: Tata, Mwana, Mpeve-Santu. Beno me mona, nionso yina na Klisto mosi, Nzambi mosi, na ntangu nionso. Ntangu yayi, beto zaba ti Yandi ke kwisa nata bisalu tatu ya lemvo: lunungu, busantu, mbotika ya Mpeve-Santu. Konso kima, na Nzambi, kele ya kulunga na tatu.

¹⁵ Mpe na yina Yandi kwisaka, mbala ya ntete, samu na kuvulusa Kento ya Yandi. Yandi ke kwisa, mbala ya zole, na Enlevement, samu na kubaka Kento ya Yandi. Yandi ke kwisa, mbala ya tatu, na Kento ya Yandi, mutindu Ntinu mpe Ntinu-kento; na manima, Kwizulu yina bantu mingi ke vingila.

Kasi na ntangu Yandi ke kwisa na mbala yayi, muntu mosi ve kasi kaka bayina me kubama ke zaba ntangu Yandi ke kwisa. Bantu mingi ke zaba ve. Bawu ke zaba ve yina ke salamina bawu. Bawu ke zanguka na zulu, na mbala mosi, mpe ba ke mona bawu diaka ve. “Ba ke soba, na mbwetolo ya meso.” Na yina beno vwanda ya kukubama samu na yawu. Ya ke vwanda mpasi na suka mosi na ntangu nkundi ya luzolo ke monaka diaka ve, muntu mosi lunga mona bawu. Ya ke vwanda kiadi na ntangu yawu ke salama mpe beno ke zimbana yawu? Na yina beno vwanda kaka na ntwala ya Nzambi.

¹⁶ Ntangu yayi, na sabala ke kwisa, kana Mfumu kuzola, na Kilumbu ya ntete ke kwisa, kubanda na Kilumbu ya ntete yayi, kana Nzambi kuzola, mu ke vutula dibuta na Arizona sika wapi bawu ke kwenda na lukolo, na yawu mu—mu ke kwisa vutuka.

¹⁷ Ntangu yayi, mu ke kwenda kuna ve . . . Mu ke na kusalu mosi ve kuna. Mu ke vwandaka na mpasi na Arizona. Mu ke kwenda kisika yankaka. Mu ke vutula kento ya munu kuna, na Kilumbu ya ntete ke kwisa. Mu ke kwisa vutuka diaka awa. Mu ke katuka awa samu na kukwenda na Colombie-Britanique. Mu ke vutuka na Colorado. Mu ke vwanda diaka na Arizona na ntangu mosi pene-pene ya Noel, kaka samu na mwa bantangu, mingi-mingi samu . . . mbala yankaka bilumbu zole to tatu, samu na kuvukisa dibuta kisika mosi, mpe kuvutuka awa na Noel, kana Mfumu kuzola, mu ke vwanda na kusalu na sabala ya mvula ya malu-malu awa.

¹⁸ Na yawu mu ke vwandaka mingi awa, na kutala mbote, na bambala mingi. Mu ke vwandaka awa bambala kumi kulutila kuna, samu beto ke na yinzo-Nzambi mosi ve to kusalu mosi ve kuna, beto ke na kima mosi ve kuna, mpamba ve, na yina me tadila kusalu na yinzo-Nzambi. Yina ke kima mosi ya kiadi samu na yawu. Mu ke na kisika mosi ve ya kutinda bana samu bawu wa Bansangu yayi, mutindu bana ya beno ke wa yawu awa, mpe—mpe yawu yina kima beto ke kondwa kuna. Kasi bawu nionso ke na mavimpi ya mbote. Ya ke ya kuyuma, mwini, nsungi ya kisiwu, kasi bana nionso ke monana na mavimpi ya mbote. Mu ke vwandaka kuna ve na ntangu ya yinda samu na kuzaba kana ya ke nsangu ya mbote to ve. Munu, mu ke vwandaka na nzietelo, mpe mu—mu—mu me butukaka muyengi-yengi.

¹⁹ Kento ya munu ke bokilaka munu . . . Mu zaba ti yandi kele awa, na yawu mu ke tubila yawu na manima ya lukutakanu, beno nionso tula ntembe na yawu. Yina ba ke bokilaka, mupepe ya nzietelo, to mupepe yina ba me ningisa, to nionso yina—nionso yina, beno zaba, zelo ya nzietelo? To, na mutindu yankaka, mu ke vwandaka kaka na nzietelo. Mpe bamvula makumi zole na zole me luta, kubanda mu me kwelaka, mpe munu, na bambala mingi, mu banza mu ke vwandaka ve na yinzo, samu ya ke lomba kaka ti mu basika.

Kasi mu ke sosa kaka ntangu yina beto ke vwanda na Yinsi yina kilumbu mosi. Kasi na ntangu yayi mvita ke fula kaka, na yawu beto vwanda na bisambu.

²⁰ Beno zimbana ve, Lumingu ke kwisa na suka, kana Mfumu kuzola, beno kwisa na bambevo ya beno mpe bayina ke na mpasi. Beno kwisa na suka-suka, beno baka kisika ya beno, mpe na kutala mbote ke vwanda na kimvuka yina ba ke sambidila. Beto ke kabula bakalati ya bisambu. Kana bantu kuvwanda mingi ve, beto ke kabula ve bakalati ya bisambu, kana ke vwanda kaka na bantu fioti samu na kusala mwa ndonga ya fioti mumbandu

bantu makumi zole na yiya to makumi tatu na sambanu, to kima ya mutindu yina. Kasi beto—beto ke kabula kaka bakalati ya bisambu, na yawu beto ke sala yawu na ngunga mosi na ntwala lukutakanu ya bantu nionso, yina mu banza ke salama . . . Ya ke vwanda na ngunga nana, nana to nana na bamuniti makumi tatu, ba ke kabula bakalati ya bisambu; ba ke zibula yinzo-Nzambi, samu na kupesa bakalati ya bisambu na Lumingu ke kwisa na suka. Mpe na yawu beno vwanda awa samu . . . Beno nata bankundi ya beno ya luzolo, beno kotisa bawu kuna na ndonga. Ya ke vwanda mbote na mupepe ya kitoko na yinzo-Nzambi, kana bawu ke bambevo, beto ke sala nionso beto lunga sala samu na kusambila samu na bawu.

²¹ Matondo na beno, diaka, samu na dikabu ya zola.

²² Ntangu yayi beto ke tanga fioti Ndinga ya Nzambi, na nkokila yayi, mpe beno kubama samu na diambu yayi ya nene ya kuvwanda na Ntwala ya Yandi diaka samu na kunatila beto Ndinga ya Yandi. Ntangu yayi, beto zaba ti beto lunga tanga masonuku, kasi Nzambi kaka ke pesa beto dilongi. Beno me mona? Beto lunga baka masonuku, kasi Nzambi fwana pesa beto dilongi. Mpe kaka na ntangu yayi beno ke zibula na Buku ya Jeremie, kapu 2 . . .

²³ Mu zola tuba ti mu ke na kiese na kuvwanda, na kati ya beto, na Mpangi Lee Vayle, mpangi mosi ya zola na Mfumu. Mu banza awa kele, na mpangi mosi awa, mu me zimbana nkumbu ya yandi, Mpangi Willard Crase. Mpe mu ke mona bampangi ya Arkansas, Mpangi John mpe bayankaka, ya kizunga ya Poplar Bluff, mpe Mpangi Blair. Mpe, oh, Mpangi Jackson, mpe Mpangi Ruddell, mpe mingi yina mu—mu lunga kaka ve . . . Mu lendaka bokila nkumbu ya konso muntu, kasi mu lunga sala yawu ve, mpe beno ke bakula. Mpangi Ben Bryant, mu ke mona yandi me vwanda awa; yandi ke vwandaka amen ya munu kuna na nsongi na ntangu mu ke . . . Muntu nionso kuzaba Ben na ndinga ya yandi. Uh-huh.

²⁴ Beto, kilumbu mosi na Californie, mu vwandaka longa Nsangu mosi samu na ba Baptiste kuna na lubwaku. Bawu vwandaka na tenta mosi ya nene kuna, na ba Baptiste aristokratiki. Mu lungaka wa “amen” ata fioti ve na bisika nionso kuna; beno zaba, bakento yankaka vwandaka na boma ti mukubu lendaka katuka na ilungi ya bawu. Na yina, beno zaba kima ya ntete, mu monaka makulu zole ya kufwanana na *yayi*, na zulu, mpe maboko zole ya nene, mpe bansuki ya ndombe ke ningana kuna, ke boka, “Amen,” ke boka mutindu yina. Mu talaka na nsi, mu tubaka, “Ben, wapi nge vwandaka?” Ya kieleka ya vwandaka sosa “amen” ya yandi.

²⁵ Mu ke mona kento ya yandi ke tala yandi mbote-mbote, fioti. Mbote, yandi ke zimbisa mwa bansuki ya yandi ya ndombe, kasi beno mona mpasi ve samu na yawu, beno zaba. Beno

wwanda na boma ve samu na yawu. Mu me zimbisaka, ya munu, kubanda ntama.

Na yawu, ntangu yayi, beno zimbana ve na kusambila.

²⁶ Ntangu yayi kaka na ntangu beto ke kota na kitini ya kieleka ya kosalu, beno bambuka moyo ti, kana beto tanga Ndinga yayi, na yina Nzambi ke sakumuna Ndinga ya Yandi. “Yawu ke vutuka na Yandi ve kukondwa kosalu, kana Yawu lungisa kikuma ya Yawu.” Mpe mu zaba ti, na ntangu mu ke tanga Ndinga, mu ke wwanda kaka ya kusungama. Na ntangu mu ke tanga Ndinga, Nzambi ke pesa lukumu na Ndinga ya Yandi.

²⁷ Ntangu yayi beto telema na luzitu nionso samu na Ndinga ya Yandi. Jeremie, kapu 2, na banzila 12 mpe 13 ya Jeremie 2.

Wwanda na ngitukulu, O . . . zulu, samu na yayi, mpe beno wwanda na boma, mpe na kiadi, mutindu me tuba MFUMU.

Samu bantu ya munu me sumuka mbala zole; bawu me zimbana munu kiziba ya masa ya moyo, mpe bawu me timuna mabulu ya masa, mabulu ya masa ya kutobuka, yina lunga ve . . . yina lunga wwanda na masa ve.

Beto kulumusa bayintu ya beto.

²⁸ Nzambi ya Luzolo, Ndinga ya Nge me tangama. Mpe beto ke sambila ti Nge ke zitisa Ndinga yina, mpe ke pesa beto na nkokila yayi kingana mosi to yina ke fwanana na Yawu; mutindu beto ke tala bilumbu yina me luta, ya Israel, mutindu bambandu, mutindu Biblia ke longa beto ti beto lunga mona yina Nge salaka na bawu na ntangu bawu tumamaka na Ndinga, mpe kumona yina Nge salaka na bawu na ntangu bawu tumamaka ve na Ndinga, mpe kulonguka yina beto fwana sala. Na yawu, beto ke sambila ti Nge ke tuba na beto na nkokila yayi na mutindu ya luswaswanu, ti beto lenda zaba yinki mutindu beto ke zinga na kilumbu yayi, yina beto me longuka na suka yayi beto ke zinga. Samu beto ke lomba yawu na Nkumbu ya Yesu. Amen.

Beno lunga wwanda.

²⁹ Mu zola tubila na nkokila yayi, samu na ntangu fioti kaka: *Mabulu Ya Masa Ya Kutobuka.*

³⁰ Israel salaka masumu zole ya nene. Nzambi tubaka ti bawu zimbana Yandi, Kiziba ya Luzingu, mpe timunaka bawu mosi mabulu ya masa samu na kunwa masa. Ntangu yayi, yawu yina ke diambu.

³¹ Kikuma mu banzaka na masonuku yayi kele samu ya me fwanana na yina mu wwandaka tuba na suka yayi, samu na ntangu beto ke zinga, mpe Kikuma yawu yina beto ke sala kingolo-ngolo.

³² Mpe beto ke baka Israel mutindu mbandu mosi, ti, yina Nzambi wwandaka, Yandi ke bikala kaka mutindu mosi. Mpe

Nzambi ke zitisaka nzila mosi kaka, yina kele, nzila ya Yandi yina Yandi ke pesaka mvutu na bantu. Mpe na ntangu bawu basikaka na nzila yina, na yawu bawu kondwaka Nzambi luzitu, mpe Nzambi kotisaka bantu na mpasi samu bawu basikaka na nganda ya yina Yandi tubaka na bawu na kusala, kukondwa kutala yina yawu vwandaka.

Yandi pesaka bawu mpe musiku, “Kusimba ve, kubaka ve, kumeka ve.” Yawu vwandaka ve ti samu yawu vwandaka yimbi na kusala yawu, kasi yawu vwandaka yimbi na kumanga kutumama na yina Yandi tubaka. Mpe kele na musiku mosi ve kukondwa ndola yina ke landa musiku yina. Samu, kana ndola kele ve, na yina, musiku ke vwandaka na mfunu mingi ve kukondwa ndola. Musiku!

³³ Ntangu yayi, beto ke mona ti, yina bawu salaka na kilumbu yina ke fwanana na yina beto ke sala bubu yayi, yina dibuundu ya bantu ke sala.

³⁴ Ntangu yayi beto ke mona kima mosi ya ngitukulu awa. Yawu lenda vwanda ya ngitukulu samu na bantu yankaka, na ntangu Yandi tubaka, “Beno me, bawu me, timuna bawu mosi mabulu ya masa, mabulu ya masa ya kutobuka.” Ntangu yayi, mbala yankaka mingi kati ya beno kuzaba ve yina ke dibulu ya masa. Yikwa zaba dibulu ya masa? Mbote, mingi kati ya beno. Kana beno me yelaka na ferme mosi, beno zaba yina ke dibulu ya masa. Mu ke bambuka moyo ti mu me nwaka banzinzi mingi yina vwandaka kwisa kuna na kati, samu na ku—kuzaba yina kele dibulu ya masa.

Mu longaka kuna na kati ya yinsi, na kati ya bayinti, sika wapi vwandaka mbidiki mosi ya nene ya kifuluka na masa ya dibulu kuna, na masa ya mvula, beno zaba, mpe yawu nunaka fioti. Mpe—mpe banzinzi, na mpimpa, lungaka kota kuna. Mpe na yina mu zaba yina ke dibulu ya masa.

³⁵ Dibulu ya masa ke kisika mosi, kima yina ba me timuna na ntoto, samu na kuzwa kisika ya dizanga ya masa. Kisika bantu ke vwandaka ve na tanki, bawu ke salaka dibulu ya masa. Na mutindu yankaka, dibulu ya masa kele tanki yina me salama na maboko ya bantu, to dizanga ya masa yina me salama na kati ya ntoto, yina muntu me timuna, samu na kukanga masa, samu na ku—kusadila yawu. Bayankaka ke sadilaka yawu mutindu masa ya kusukula, mpe bayankaka ke sadilaka yawu mutindu masa ya kunwa, mpe mutindu ya luswaswanu, mbala yankaka. Masa nionso beto vwandaka na yawu, na ntangu me luta, vwandaka masa ya dibulu. Beto vwandaka na kima mosi ya nkulu yina beto lendaka balula, balula, balula, balula, samu na kumatisa masa; kuvwandaka na mwa bankantini ya kukanga na yawu, samu na kupompa masa na dibulu.

³⁶ Mbote, beto bakulaka kima mosi samu na dibulu ya masa yina me swaswana na dizanga ya masa. Ntangu yayi, dibulu ya

masa ke vwanda ya mpamba. Dibulu ya masa lunga kukifulusa ve yawu mosi. Ya ke—ke . . . Ya ke ya kutudila ntima ve. Beno lunga tula ntima ve na dibulu ya masa. Yawu ke tula ntima mpe ke vingila kaka bamvula yina ke nokaka na été to na hiver, mpe nionso yina ya ke samu na ku . . . Na ntangu nionso, na hiver na ntangu mvula—mpembe mpe mvula ke kwisa, na yina ya ke kotisa masa na dibulu ya masa. Mpe kana yawu baka masa yina ve, na yawu beno—beno ke vwanda na masa ve. Nionso ke—nionso ke . . . yuma. Mpe yawu ke kukifulusa yawu mosi ve. Dibulu ya masa ya nkulu lunga kukifulusa yawu mosi ve. Yawu ke fuluka na ntangu mvula ke noka.

³⁷ Mpe mu zola ti beno bakula kima yankaka na yina me tadila dibulu ya masa. Ntangu nionso, beno ke mona ti, to yawu vwandaka mutindu yina na yinzo ya beto, dibulu ya masa . . . Ntangu nionso kidikilu ke vwandaka nene mbala zole na yinzo, mpe bawu ke baka masa na kidikilu, mpe ke kotisa yawu na dibulu ya masa. Mu ke bambuka moyo ya dibulu ya masa yina kuna, na ntangu yandi vwandaka . . . na ntangu batiyo vwandaka kulumusa yawu, kaka, na kidikilu. Yawu ke fuluka na masa yina ke kulumuka na kidikilu.

Na yawu masa ke kulumuka na muludi ya kidikilu; sika wapi, baniama nionso yina ke niata bisika nionso na lupangu, mpe bamvindu nionso yina ke vwandaka na zulu ya kidikilu, na kisiwu. Mpe na yawu masa ke kwisa mpe kulumusa yawu nionso na muludi ya yinzo, na tiyo yina me salama na maboko ya bantu, na mundongolosi yina me salama na maboko ya bantu, mpe na dibulu ya masa yina me salama na maboko ya bantu. Mpe kana beno me monaka ntete mvindu ve, mu zaba ve yina beno ke vwanda na yawu, na ntangu beno kele na dibulu ya masa mosi. Yinga, tata! Nionso yina me salama na maboko ya bantu, mpe mvindu kaka mutindu yawu lunga vwanda.

³⁸ Beno zaba, beto vwandaka bokila . . . Beto vwandaka na kitenda ya lele mosi na zulu ya yawu mutindu kiyungulu. Beno me zabaka ve yina yawu vwandaka? Beto vwandaka tula kitenda ya lele mosi na zulu ya yawu mutindu kiyungulu, samu na kukanga banzinzi nionso mpe bima nionso yina ke kulumuka na zulu ya kidikilu, mpe bisika nionso, mpe yina vwandaka luta awa mpe kuna, samu na kukota na dibulu ya masa. Mpe beto vwandaka tula kitenda ya lele na zulu ya yawu mutindu kiyungulu, samu na kukanga mvindu nionso mpe nionso yina beto lungaka kanga. Ya kieleka, yina lendaka kanga mvindu ya kieleka ve, yawu vwandaka kanga kaka bima ya nene yina vwandaka kulumuka mpe yina bwaka na kati ya yawu. Mpe nzinzi lendaka kubwa na kati ya yawu, kasi masa ya nzinzi vwandaka kulumuka na masa. Na yawu, beno—beno ke vwanda ya kieleka na mvindu mingi na ntangu beno ke na dibulu ya masa ya mvindu.

³⁹ Na mwa bilumbu fioti, na ntangu beno ke bika masa yina kuna, mpe yawu ke ningana diaka ve. Na ntangu beno ke bika masa na kati ya dibulu ya masa mosi, yawu ke ningana diaka ve. Mpe yawu ke fuluka na—na makototo, mpe miseleketete, mpe banioka. Mpe beto vwandaka bokila yawu “mataka-taka,” ya fioti mingi. . . Mu zaba kana. . . Bawu ke baparaziti ve, bawu ke. . . Mu lunga ve, mu zaba ve yina beno ke bokila yawu. Kasi mwa bima ya fioti mingi kotaka na masa, yina—yina beto ke bokila mataka-taka. Beno zaba yina yawu kele. Yikwa zaba yina mu ke tubila? Oh, samu, ya kieleka, beno nionso zaba samu beno ke bantu ya banseke. Masa yina ke ningana diaka ve bisika nionso, mpe bima yayi ke zolaka masa yina ke ninganaka ve ke kwisa na yawu. Bawu ke kwisa kaka, samu ya ke masa yina ke ninganaka ve. Mpe samu yawu ke ningana ve, yawu ke benda baniama yina ke zolaka bima bima yina ke ninganaka ve.

⁴⁰ Mpe yina me fwanana na mabuundu ya beto mingi bubu yayi. Mu banza bawu me bika. . . Disumu ya kulutila nene yina dibuundu me sala bubu yayi, kaka mutindu Israel salaka, yawu me yambula Yandi, Kiziba ya Masa ya moyo, mpe me timuna bawu mosi mabulu ya masa yina me salama na maboko ya bantu. Mpe yawu me kuma kisika ya bima yina nionso ke zolaka masa ya mutindu yina. Miseleketete, makototo, mpe bamikolobo ya mvindu ya mutindu na mutindu, ke zinga na kati ya yawu, samu ya ke tanki yina me salama na maboko ya muntu. Mpe na kati ya tanki yayi bima yayi ke vwanda kuna, mbandu ya kieleka ya ba denomination ya beto bubu yayi.

⁴¹ “Ntangu yayi,” beno ke tuba, “Mpangi Branham, samu na yinki nge ke nganina bantu yina na ngolo nionso?”

Ba fwana nganina yawu. Ba fwana nganina yawu. Beno kwenda ntama na yawu, samu yawu ke twadisa na kidimbu ya niama. Beno bambuka moyo, yina ke Kieleka! Ya ke vwanda kidimbu ya niama. Denomination ke twadisa kaka na yawu. Yawu me finama na kukuma kuna ntangu yayi, na ngolo, ya luyalu.

⁴² Beno tala kuna na kimfumu ya nkulu ya Rome. Yawu yina ya kieleka twadisaka bawu na kidimbu yina ke manga lukwikilu. Beno ke mona ti muntu mosi lendaka sumba ve to kutekisa ve kukondwa kidimbu ya niama. Yandi ke vwanda na yawu ntete.

⁴³ Kele na bimvuka zole ya bantu na zulu ya ntoto: bayina ke na Kinieminu ya Nzambi, mpe bayina ke na kidimbu ya niama. Bimvuka zole kaka, na yawu ke vwanda na yayi to yina. Ya ke vwanda kumanga lukwikilu, kidimbu ya—ya nsambulu, kumanga ya nsambulu.

⁴⁴ Mpe ya ke vwanda na kizizi ya niama. Mutindu beto me longuka yawu, beto ke mona ti Rome vwandaka, kele, mpe ke vwanda ntangu nionso, kidi- . . . to, niama. Ya kieleka. Kele na mutindu ya kusoba yawu ve. Rome!

45 Mpe yinki Rome salaka? Yawu sobaka kubanda na Rome ya mumpani tii na Rome ya pape, mpe salaka organisation ya systeme mosi, systeme ya bantu nionso, yina kotisaka na kingolo-ngolo muntu nionso na nsambulu yina mbayi-mbaya ba ke fwa beno.

46 Mpe ya ke diambu mosi ya ngitukulu yina Etats-Unis yayi me sala, mpe yawu me fwanana na mwana-dimeme. Mpe mwana-dimeme ke vwandaka na misengu zole ya fioti, muswa ya bantu mpe ya dibuundu. Mpe na manima mwa ntangu fioti, na ntangu yandi vwandaka mwana-dimeme, beto ke mona ti yandi vwandaka tuba mutindu dalango mpe vwandaka na ngolo nionso yina dalango vwandaka na yawu ntete. Mpe Biblia ke tuba na beto ti bawu tubaka, “Beto sala kidimbu na kizizi ya niama.” Kizizi ke kima yina me fwanana na kima yankaka. Mpe beto lunga mona yawu kaka ntangu yayi ti, na mutindu ya yawu ya kumanga lukwikilu, dibuundu ke sala Conseil Mondial ya Mabuundu, yina ke kizizi ya ngolo ya Rome; mpe ke pusa bantu na kingolo-ngolo na kima yina Rome ya mumpani salaka. . . to yina salaka Rome ya pape. Na yawu, kele na mutindu yankaka ve, to kima yankaka ve. Kasi yina ke Kieleka.

47 Mpe kikuma yawu yina mu ke nganina yawu na nsungi ya munu, na ntangu ya munu, samu ya me lombama ti ba nganina yawu. Lubokilu kele, ti, “Benoni basika na nganda ya yandi, bantu ya Munu, samu beno kota ve na masumu ya yandi!”

48 Ntangu yayi, mu ke fwanikisa yawu na mabulu ya masa yayi ya mvindu, ya masumu. “Yandi ke Kiziba ya Luzingu. Yandi ke Masa ya moyo.” Mpe bantu ke bika Yina, mpe ke timuna bawu mosi mabulu ya masa yina lunga kanga kaka masumu. Yina ke kima mosi kaka yawu lunga kanga. Yawu yina denomination ke salaka; yawu ke kanga konso kima yina ke kwisa pene-pene mpe zola kota na yawu. Bawu me kubama na kukotisa yawu kana ya ke na mbongo, to lunga lwata konso mutindu yina. Kukondwa kutala nani bawu kele, wapi bawu me katuka, bawu ke baka bawu, na mutindu nionso.

49 Ntangu yayi beto ke mona, diaka, ti, kidimbu yayi ya niama yina salamaka awa. . . Kumi na tatu kele ntalu ya Amerique. Yawu butukaka na koloni kumi na tatu. Ya ke na drapeau ya bambwetete kumi na tatu, banzila kumi na tatu. Mpe ya ke monana na Apocalypse kapu 13. Mpe Amerique ke vwandaka ntangu nionso, na kizizi ya kento na zulu ya kibende ya mbongo ya beto. Ata mpe yintu ya Indien, na zulu ya mpata mosi, kele na kizizi ya kento mosi. Beto zaba yawu, beto zaba disolo ya yawu. Konso kima, Ngunga ya Kimpwanza, mpe konso kima yankaka, kimpwanza. . . Kiteki ya Kimpwanza, nionso kaka, kento. Ntalu kumi na tatu; kele kento. Benoni me mona? Ntangu yayi, ya ke—ya ke kitoko na kutala bima yina.

⁵⁰ Mpe ntangu yayi mu zabisaka na ntwala yina Nzambi monasaka na munu, to na nzila ya vision ya 1933, ti mambu tatu ke salama na ntwala ya ntangu ya nsuka. Mpe yina, mosi na yawu, ti, “Mussolini, yina kumaka ntwadisi mosi ya nku, yandi ke vwanda ntwadisi mosi ya nku; mpe diaka, mpe yandi ke kwisa mpe ke kwenda kuna na Ethiopie mpe ke baka Ethiopie; mpe Mpeve, Yawu tubaka, ‘yandi ke bwa na makulu ya yandi.’”

⁵¹ Mu ke kukiyufula kana kele diaka na bantu ya ntama yina me bikala na tabernacle, yina ke bambuka ti mu tubaka yawu kuna na Redman’s Hall awa ntangu mu longaka yawu, bamvula mingi, mingi me luta. Kele na mosi awa na kati ya yinzo yayi, na nokokila yayi, yina vwandaka kuna na Redman’s Hall ya nkulu na ntangu mu longaka yawu, na ntangu vwandaka na N.R.A. kuna, na ntangu Roosevelt vwandaka na bamvula ya yandi ya ntete ya luyalu? Mu banza ata mosi kele awa ve. Kele na mosi? Yinga, yinga, mosi, kele na mosi. Yinga, Mama Wilson, mu ke bambuka yandi. Kento ya munu, me vwanda kuna na manima. Zole me bikala, na kati ya bantu ya nsungi yina ya nkulu ya bilumbu yina.

Ti, na ntangu bawu vwandaka tuba ti N.R.A. yayi vwandaka kidimbu ya niama, mu tubaka, “Kima mosi ve na yawu; na nionso. Kidimbu ya niama me katuka awa ve. Yawu me katuka na Rome. Mpe yayi ke kidimbu ya niama ve.”

⁵² Ntangu yayi beno bambuka moyo ti mambu yayi kutubamaka na ntwala. Mu tubaka, “Adolf Hitler ke vwanda na nsuka mosi ya mpasi. Mpe yandi ke lomba mvita na Etats-Unis. Mpe bawu ke tunga kikaku mosi ya nene, ti bawu lunga zinga na kati ya yawu. Mpe kaka kuna ba ke bula ba Americain, na mutindu ya yimbi.” Mpe yawu vwandaka kikaku ya Siegfried, bamvula kumi na tatu na ntwala bawu banda na kutunga yawu. Mpe na yawu mu tubaka, “Kasi yandi ke kuma na nsuka ya yandi; mpe Etats-Unis ke nunga mvita.”

⁵³ Mpe na yawu mu tubaka, ti, “Kele na ba isme tatu: Nazisme, fascisme, mpe communisme.” Mpe mu tubaka, “Bawu nionso ke suka na communisme. Russie ke kotisa bawu nionso, na communisme.”

⁵⁴ Mpe mu tubaka, “Na yawu mayele ya bantu ke kuma mingi, ti muntu ke kuma na mayele mingi, tii kuna yandi ke sala bima mingi tii kuna yandi ke sala ditoma mosi ya kufwanana na diki, yina ke vwanda na ditenzi na zulu ya yawu, mpe yawu ke twadisama na ngolo yankaka na kisika ya volant.” Mpe ba ke na voiture yayi.

⁵⁵ Mpe mu tubaka, “Na yawu bumuntu ya bakento ke bwa na bima ya mpamba-mpamba, tii kuna bawu ke pesa nsoni na bayinsi nionso. Bawu ke lwata bilele ya babakala. Bawu ke katula bilele ya bawu tii kuna bawu ke bikala kaka na ba

sous-vetements, kaka. Mpe, na nsuka, bawu ke lwata kaka dititi ya fiki.”

Mpe kana beno ke bakula, na ngonda yina me luta ya magazine *Life*, bawu vwandaka na kento yina me lwata matiti ya fiki. Mpe yina ke mvwatu ya nkokila, to robe ya nkokila, yina ba ke lwataka na nkokila; kiyungulu, beno lunga mona na kati ya yawu, kaka matiti ya fiki yina ke bumba mwa kitini ya nzutu ya yandi; ya kukondwa bansinga, to bansinga, bamayo ya kukondwa bansinga, na zulu ya yawu, yina ke monisa nzutu. Mpe yinki mutindu bima yina salamaka!

⁵⁶ Na yawu mu tubaka, “Mu monaka kento mosi basikaka na Etats-Unis, mutindu ntinu-kento mosi ya nene to kima ya mutindu yina. Mpe yandi vwandaka kitoko mingi na kutala, kasi yandi vwandaka ya ntima ya nku. Mpe yandi bendaka yinsi ya muvimba, mpe yawu kumaka na nsi ya luyalu ya yandi.”

⁵⁷ Na yawu mu tubaka, “Na nsuka, Yandi tubaka na munu na kutala na manima kuna na Este diaka. Mpe, na ntangu mu talaka, mu monaka, mpe yawu monanaka, mutindu ti, yinza ya muvimba kupanzanaka. Mpe mutindu mu vwandaka tala yawu na ntama, yawu vwandaka kaka na bitini ya bayinti, mpe—mpe matadi ya mulinga kubwaka na ngolo nionso na zulu ya ntoto.”

Mpe mambu yayi ke salama na ntuala ya nsuka ya yinza. Mpe tanu na kati ya sambwadi me salamaka ntete, na mvula makumi tatu na tatu. Beto me kuma na kisika yango, na nsuka ya ntangu!

⁵⁸ Mpe mu ke teleminaka systeme yina ya denomination kubanda ntama. Mpe mu ke kwikila kaka, na nkokila yayi, ti ya ke poto-poto, ti kele kisika yina mvindu nionso me vwanda. Mu lunga kwikila ve ti Nzambi lenda vwanda na kima ya mutindu yina na Dibuundu ya Yandi, samu yawu fwana butuka kaka na Mpeve ya Nzambi mpe yina me sukulama na ntuala ba ke bokila yawu ya Yandi. Nzutu ya mansweki ya Klisto, beto me botama na kati ya Yawu na nzila ya mbotika ya Mpeve-Santu.

⁵⁹ Yinga, systeme yayi ya dibulu ya masa kele mbandu mosi ya kieleka ya denomination. Muntu ya ndwenga ke zibula meso ya yandi, mpe ke sadilaka yawu ata fioti ve, samu Nzambi talisaka yawu na kati ya bansungi ti Yandi ke telemina yawu mpe ke salaka na yawu ata fioti ve. Kimvuka nionso... Na ntangu nionso muntu vwandaka kwisa na nsangu, mumbandu Luther, Wesley, to nionso yina, mpe Smith, mpe Calvin, mpe bawu nionso, na ntangu bawu salaka organisation mosi, Nzambi tulaka kima yina na lweka mpe sadilaka yawu diaka ve na reveil mosi.

⁶⁰ Beno tala na masolo. Kele na ntangu mosi ve yina Nzambi bakaka denomination mosi, mpe salaka reveil mosi na nzila ya yawu, kisika mosi ve. Na yawu, na kati ya masolo mpe na Biblia, yawu me ndimisama ti yina ke kima ya mvindu na meso ya

Nzambi, na yawu mu zola vwanda na kima ya kusala na yawu ve. Mpe kikuma yawu yina mu ke telemina yawu. Mu ke meka na kubasisa bantu kuna.

⁶¹ Beto me bokilama, mutindu yina salamaka na Israel, mpe ya ke na ntangu yayi, na kutala Israel samu na kumona bambandu. Bawu, na ntangu nionso bawu bikalaka na Kiziba yina, bawu vwandaka ya kusungama. Kasi na ntangu bawu tobolaka mabulu ya masa bawu mosi, ba systeme ya bantu, na yina Nzambi bikaka bawu kuna. Yandi ke sala mutindu mosi na beto. “Bawu bikaka Yandi, Kiziba ya Masa ya moyo.” Yawu yina Nzambi teleminaka bawu. “Kusala kima mosi ti bawu lungaka tuba, ‘Beno tala yina beto me sala!’”

⁶² Ntangu yayi, na ntangu ya nzietelo ya Moise; na ntangu Nzambi, na lemvo, pesaka bawu profete, pesaka bawu Dikunzi ya Tiya samu na kutambula na ntwala ya bawu, mpe ndimisaka Yawu na bidimbu mpe bimangu. Lemvo pesaka bima yayi nionso. Israel vwandaka zola kaka, mpe monaka kaka musiku. Bawu mangaka lemvo, samu na kubaka musiku.

Ya kieleka yawu yina bantu ke sala bubu yayi. Bawu ke manga Ndinga, samu na kubaka ba systeme ya denomination, samu na yawu bawu lunga sala yina bawu zola sala mpe kukwenda na ntwala. Kasi beno lunga sala yawu ve kati na Klisto! Beno ke kabwana na nionso mpe ya muvimba, samu na kuvwanda na Klisto.

⁶³ Kubika dizanga ya masa ya kisina, systeme yina me salama na maboko ya bantu to dibulu ya masa, beno ke banza ti muntu ke sala mutindu yina? Beno lenda banza mutindu ya mabanza ya muntu yina ke nwa masa na dizanga yina ya masa ya kisina, mpe yandi bika yawu samu na dibulu ya masa yina me salama na maboko ya bantu mpe yina ke na makototo, mpe miseleketete, mpe mataka-taka, mpe bima yina nionso na kati ya yawu?

Yawu ke monana ya kusungama ve na bumuntu, kasi yawu yina kaka bantu me sala. Bawu me bika Ndinga, Kiziba ya kieleka ya yinto mpe ya Ngolo ya Nzambi, samu na kunwa kuna na mabulu ya masa, mpe ke sala bawu mosi mabulu ya masa. Mutindi bawu salaka na ntangu me luta, bawu me sala yawu diaka bubu yayi. Bawu ke tuba . . .

Yandi tubaka, “Bawu me bika Munu.” Awa Yandi tubaka, awa na Jeremie 2:14, to 13, kuna. Yandi tubaka, “Bawu me bika Munu, Kiziba ya Masa ya moyo.”

⁶⁴ Ntangu yayi, beto me mona yina ke dibulu ya masa. Beto me mona yina yawu ke kangaka. Beto me mona yinki mutindu yawu me salamaka. Yawu ke kima yina me salama na maboko ya bantu yina me katuka na muludi mosi ya mvindu. Masa yina ke bwaka kuna, ke kutana na muludi mosi ya mvindu, mpe yawu ke baka kaka nionso yina ke na muludi, ke lutisa yawu na mundongolosi yina me salama na maboko ya bantu, na tiyo yina me salama na

maboko ya bantu, mpe ke kotisa yawu na tanki yina me salama na maboko ya bantu. Mpe bamvindu nionso ke kutana kuna na kati, mpe mikolobo, mpe miseleketete, mpe makototo, mpe bima nionso ya ntoto, ke zolaka yawu. Mpe, beno bambuka moyo, yawu ke baniamya ya mvindu; mataka-taka, ya masa yina ke ninganaka ve. Ditaka-taka lunga zinga ve na masa ya bunkete. Kana yawu sala yawu, yawu ke fwa yandi. Yandi ke vwanda na masa yina ke ninganaka ve.

⁶⁵ Mpe ya ke mutindu mosi na mingi ya baparaziti yayi bubu yayi. Beno lunga zinga ve na masa ya madidi ya Mpeve-Santu. Kikuma yawu yina bawu ke telemina Ndinga na ngolo nionso, mpe ke tuba, “Ya ke kukitelemina Yawu mosi. Kima mosi ve ke na Yawu.” Samu bawu ke na nsatu ya basini ya masa yina ke ninganaka ve samu na kubaluka kuna na kati. Ya kieleka.

Ya ke mutindu mosi na makototo, mpe miseleketete, mpe mataka-taka, mpe nionso yina ke fwanana na yawu. Bawu ke na nsatu ya dizanga mosi to basini mosi, samu na kuzinga, samu nkadulu ya bawu ke zingaka kuna. Mpe beno lunga soba niama mosi ve kana beno me soba nkadulu ya yandi ve.

Mpe beno lunga sala ve ti muntu mosi kumona Ndinga ya Nzambi kana nkadulu ya yandi me soba ve; mpe na ntangu nkadulu me soba na yina yandi kele, na mwana ya Nzambi, mpe Mpeve-Santu ke kwisa na yandi. Mpeve-Santu sonikaka Ndinga ya Nzambi!

⁶⁶ Mu vwandaka solula bubu yayi na nkundi ya munu ya mbote, Docteur Lee Vayle, yina kele awa na ntangu yayi. Mpe yandi ke theologien mosi ya kieleka, mpe kikuma yawu yina beto ke vwandaka na mwa—beto ke vwandaka na mwa masolo ya kitoko mingi na yina me tadila Masonuku. Ya ke muntu ya mayele mingi.

Mpe kilumbu mosi yandi yifulaka munu yina ke kidimbu ya kieleka ya Mpeve-Santu, “Yawu ke kutuba bandinga ya malu-malu?” Yayi vwandaka na bamvula mingi me luta.

Mu tubaka, “Ve; mu lunga mona yawu ve.”

Yandi tubaka, “To mu lunga sala yawu ve,” yandi tubaka, “mu me longukaka yina.” Yandi tubaka, “Yinki nge ke banza ke kidimbu?”

⁶⁷ Mu tubaka, “Mu banzaka ti kidimbu ya kieleka kele zola.” Mpe beto vwandaka solula yawu.

Mpe mu banzaka ti yina vwandaka mbote mingi na mutindu ti mu kangamaka na yawu, “Kana muntu mosi kele na zola.”

Kasi kilumbu mosi Mfumu, na kati ya vision, sungikaka munu. Mpe Yandi tubaka, ti, “Kidimbu ya Mpeve kele bayina lunga ndima Ndinga,” zola ve, kutuba na bandinga ya malu-malu ve, kasi kundima Ndinga.

68 Mpe na yawu Docteur Vayle tubaka na munu, ti, “Yina ke Masonuku,” yandi tubaka, “samu, na Jean 14, Yesu tubaka, ‘Na ntangu Yandi Mpeve-Santu ke kwisa na beno, Yandi ke monisa na beno mambu yayi, yina Mu me longa beno, mpe ke talisa na beno mambu yina ke kwisa.’”

Tala yina ke kidimbu ya kieleka ya Mpeve-Santu! Ata fioti ve Yandi me tubaka na munu kima mosi ya luvunu. Ti, “Kidimbu ya Mpeve-Santu, kele yandi yina lunga kwikila Ndinga.” Kana beno lunga ndima Yawu.

Samu, Yesu tubaka ata fioti ve, “Na ntangu Mpeve-Santu ke kwisa, beno ke tuba bandinga ya malu-malu.” Yandi tubaka ata fioti ve ti, na ntangu Mpeve-Santu ke kwisa, beno ke sala mosi ya bima yina. Kasi Yandi tubaka, “Yandi ke baka bima yina me tadila Munu mpe ke monisa yawu na beno, mpe ke talisa na beno mambu yina ke kwisa.” Yawu yina ke kidimbu ya kisina ya Mpeve-Santu, na kulanda Yesu Yandi mosi.

69 Na yawu kuningana nionso ya nzutu mpe bima nionso yina bantu ke na yawu mpe yina ba ke sala, beno lunga mona samu na yinki bawu ke sala yawu. Beno tala, yawu me kuma denomination, to masa yina ke ninganaka ve na kati ya basini, mpe ata fioti ve denomination mosi ke tungama na zulu ya ku- . . . Ndinga ya kulunga ya Nzambi. Ya ke sala yawu ve, samu beno lunga sala Nzambi nomination to denomination mosi ve. Ve, tata!

70 Kikuma kele ti, beno baka nkangu ya bantu yina lunga kwikila na Ndinga, bika bawu banda organization. Beno zaba kima ya ntete, na mvula mosi ke vwanda na nkangu ya ba Ricky ke vwanda kuna na kati bayina beno ke sala na bawu kima mosi. Bawu me baka luyalu, mpe beno lunga sala na bawu kima mosi ve. Yina ke systeme ya Nzambi ve. Ve, na yawu beto zaba ti kima yina ke na nganda. Yawu me kuma dibulu ya masa, mpe yawu me kuma sika wapi muntu nionso ke kakula *yayi, yina*, to *yankaka*, samu na kuvwanda na bakwikidi mingi, to samu bantu kukota kuna.

71 Beto ke mona ti, na ntangu systeme yayi kubandaka, na bilumbu ya bantu ya Israel, na ntangu bawu tobulaka mabulu ya masa yayi. Mpe muntu mosi mpe nkangu ya ba Pharisien yina tobulaka mwa mabulu ya masa. Mpe bawu vwandaka na muntu mosi na nkumbu ya Herode, mpe yandi vwandaka mupesi-nsangu, mfumu ya kizunga.

Mpe yandi kwisaka kuwa muntu yina vwandaka lutisa ntangu ve na ba denomination ya bawu. Yandi vwandaka profete. Mpe profete mosi ve me vwandaka na kima ya kusala na denomination mosi, kasi yandi yinaka yawu. Profete yayi bandaka na kutuba, “Beni tuba ve na beno mosi ti, ‘Abraham ke tata ya beto,’ samu mu ke tuba na beno ti Nzambi ke na kiyeka ya kubasisa bana ya Abraham na matadi yayi.”

⁷² Mpe bawu tindaka muntu mosi ya lukumu samu na kuwa yandi. Mpe muntu yayi ya lukumu bakaka kento ya mpangi ya yandi, mpe kwelaka yandi. Mpe yinki muntu yayi tubaka na yandi kukondwa nsoni? Bawu banzaka ti yandi lungaka kakula, mpe kutuba, “Ntangu yayi, tata, nge, nge ke na kiti ya kitoko *awa*. Mpe nge lenda . . . Mu ke na kiese samu nge me kwisa awa samu na kuwa munu bubu yayi.”

Jean kwisaka na ntwala ya yandi, mpe tubaka, “Nge ke na muswa ve ya kubaka yandi.” Kima ya ntete yandi tubaka, yandi nganinaka yandi samu na disumu ya yandi.

⁷³ Beno me mona, ba denomination de buta babasini ya masa yina ke ninganaka ve sika wapi babakala lunga zinga na bakento, mpe bakento yina lunga sala nionso bawu me zola, mpe kuzengisa bansuki ya bawu, mpe kulwata bakupe, mpe konso kima yina, mpe bawu mosi ke kukibokila Baklisto.

Kasi Kiziba yina ya kisina, alleluia, ya Ngolo ya Nzambi, yawu lunga vwanda kuna ve, samu Yawu ke basisa yawu na nganda. “Mu ke Kiziba ya Bamasa ya moyo. Bawu me bika Munu, samu na kutobula bawu mosi mabulu ya masa.”

⁷⁴ Ntangu yayi, kiziba ya masa ya moyo, beto me mona, yina ke kiziba ya masa ya moyo? Beto me mona yina ke dibulu ya masa, ntangu yayi yinki ke kiziba ya masa ya moyo? Yawu ke dizanga ya masa ya kisina.

“Yinki kele, dizanga ya masa ya kisina, Mpangi Branham?”

Ya ke dizanga ya masa yina ke na yinto ya yawu na nsi ya ntoto mpe ke basisa masa ya yawu. Ya ke basika ntangu nionso. Yawu me lunga na yawu mosi. Dizanga ya masa ya kisina, kele na madidi mpe bunkete ntangu nionso, kiziba ya masa ya luzingu. Yawu ke ya kufwa ve mpe masa yina ke ninganaka ve. Ya ke zinga, mpe ke soba ntangu nionso, mpe ke nata ntangu nionso kima mosi ya malu-malu, ke kwenda na ntwala, mpe ke baka masa na bayinto ya yandi. Yandi ke baka bayinto ya yandi na—na yandi mosi, yina ke . . . kaka bamasa ya moyo yina ke basika. Ke kukisukula yawu mosi; ya ke masa ya bunkete, ya kukondwa mvindu, ya bunkete. Yawu me lunga na yawu mosi; beno lunga vingila ve masa ya mvula samu na kifulusa tanki ya yandi. Ya ke toka ntangu nionso, mpe ke pesa masa ya yandi ya ofele. Beno ke pompa yawu ve, kumatisa yawu, kubalula yawu, to kukota na yawu. Yawu ke kaka kiziba ya bamasa ya moyo.

⁷⁵ Beno zaba, beno baka mabulu ya masa yayi ya nkulu, beno ke balula yawu mpe ke balula yawu mpe ke balula yawu, mpe pompa yawu mpe nionso yina, samu na kubasisa mwa masa yina ke ninganaka ve. Hum!

Kasi Kiziba ya Masa ya moyo ke basisa Yawu, ya ofele, kukondwa kupompa, kukota na yawu, mpe nionso yina. Oh, mu ke na kiese samu na Kiziba yina! Yinga, tata!

⁷⁶ Ya ke na nsatu ya kiyungulu na zulu ya Yawu ve, samu na kubasisa ba parasite. Samu, Yawu me katuka na mudindu ya mingi, kuna na Ditadi ya nene, ti parasite mosi ve ke vwanda kuna.

Yawu ke na nsatu ve ya kitenda ya lele ya luzabu na zulu ya Yawu, ya kieleka, mwa systeme ya yinza ya mayele ya denomination yina me salama na maboko ya bantu; samu na kutuba na beno, na ntwala ya munganga ya bimbevo ya yintu, kana beno lunga longa to ve. Yawu ke na kitenda ya lele ya mvindu na zulu ya Yawu ve. Ya ke pusa yawu na nswalu nionso kaka na ntangu beno ke tula yawu kuna. Beno lunga sala mutindu yina ve. Dizanga ya masa yina ke toka, ntangu nionso. Kana beno tula mosi ya bitenda ya lele ya bawu na zulu ya yawu, yawu ke losa yawu na simu yayi to yina. Yawu ke na nsatu ya ntangu ya denomination mosi na zulu ya yawu ve.

⁷⁷ Yawu ke na nsatu ya kiyungulu mosi ve, kuyungula ve, kupompa ve, kuningisa ve, kima yankaka ve. Yawu ke toka, kaka kuna. Yawu ke tula ntima na masa ya mvula ve samu na kufulusa yawu. *Bamvula* kele “ba reveils,” sika wapi Kiziba . . . Yina ke Kiziba ya Luzingu. “Sika yina ke vwanda Mvumbi, kele sika yina ke vukana bampongo.” Beno ke pompa reveal mosi ve; beno ke pompa kima mosi ve. Kima mosi kaka ya kusala kele kukwisa kaka na Kiziba. Yawu ke ya kufuluka na masa ya mbote, ya madidi, mpe Yawu ke na nsuka ve. Yawu ke toka kaka.

⁷⁸ Beno fwana kwenda ve na dibulu ya masa, mpe kutuba, “Mbote, kana yawu noka mpe beto ke baka masa na muludi ya kidikilu, beto ke vwanda na masa ya kunwa.” Beno me mona? Oh, la la, la la! Yayi ve. Dizanga ya masa yina ya kisina ke basisa kaka masa ya mbote, ya madidi ntangu nionso. Beno ke tudila yawu ntima. Beno fwana tuba ve, “Mbote, mu ke kwenda kuna na dibulu ya masa yina ya nkulu. Beto vwandaka nwa masa ya yawu, kasi mvula ke noka diaka ve kubanda ntama. Mu ke tuba na beno, yawu lenda yuma.”

⁷⁹ Yina ke mutindu mwa ba systeme yayi me salama na maboko ya bantu. Beno lunga kota na yawu, kana beno ke na kima mosi ya nene, kimvuka mosi ya nene samu na kutekisa kima mosi, to—to mambu mosi ya nene, bankinzi ya nene mpe bima yina nionso, bansaka ya loto, mpe bafeti na bayinzo ya nsi ya ntoto, mpe nionso yina, beno lunga kuta bantu ya kufuluka kuna.

Kasi kana beno kwenda na Kiziba yina ke toka, ntangu nionso, bantu me vwanda kuna ke nwa masa ya mbote, ya madidi. Beno lunga tula ntima na Yawu! Beno ke tuba, “Bawu vwandaka na reveal ve bamvula kumi me luta.” Kana beno zinga pene-pene ya Kiziba yayi, Yandi ke vwanda kaka na reveal.

⁸⁰ Mutindu tubaka Gallois yayi ya leke. Mpamba ve, kilumbu mosi kuvwandaka na reveal na yinsi Galles, bantu ya lukumu katukaka na Etats-Unis. Mwa ba Docteur yayi ya nene ya

Théologie kwendaka kuna na yinsi Galles, samu na kutala kisika mpe yinki nionso yayi vwandaka. Bawu balulaka bansongi ya bilele ya bawu na manima, mpe bayimpu ya bawu ya kutekama, bawu vwandaka tambula na bala-bala.

Mpe awa kwisaka pulusi mosi ya leke, yina vwandaka balula na maboko ya yandi mwa matraki ya yandi ya nkulu, ke bula musembu mosi, “Na kulunsi sika wapi Mvulusi ya munu kufwaka, mu me kwisa na mpasi na ntima; kuna Menga sukulaka ntima ya munu, nkembo na Nkumbu ya Yandi,” ke kulumuka na bala-bala.

Na yawu bawu tubaka, “Yayi ke monana muntu ya bisambu. Beto kwenda yufula yandi.” Mpe bawu tubaka, “Tata!”

Yandi tubaka, “Yinga, tata?”

Yandi tubaka, “Beto me katuka na Etats-Unis. Beto ke kimvuka yina ba me tuma. Beto me kwisa awa samu na kulonguka yina ba ke bokila, reveil ya yinsi Galles. Beto ke ba Docteur ya Théologie, mpe beto kele awa samu na kuzaba yina yawu kele.” Yandi tubaka, “Beto zola zaba kisika reveil kele, mpe sika wapi ya ke salama.”

Yandi tubaka, “Tata, beno me kuma kisika yango. Mu ke reveil ya yinsi Galles.” Amen! “Reveil ya yinsi Galles kele na kati ya munu. Kele awa sika wapi yawu ke salama.”

⁸¹ Yina ke mutindu mosi na ntangu beno ke zinga na nzila ya Kiziba yina ya Bamasa ya moyo. Ya ke zinga ntangu nionso, ke toka mpe ke toka, mpe ke toka mpe ke toka. Nsuka ke vwanda ve na Yawu. Kele ve ti, “Kwenda tala kana mwa masa kele, kana beto ke vwanda na masa ya mvula ntama mingi ve,” ya ke mutindu yina ve. Yina ke Kiziba ya Masa ya moyo. Mutindu me tuba, Yawu ke pesa Masa ya Yandi ya ofele.

⁸² Beno fwana tula kitenda ya lele na zulu ya Yawu ve, samu na kumona; mwa bitenda ya lele ya luzabu, na ntwala beno tinda yandi na kulonga, mpe kutala kana yandi ke sonika bampova ya yandi mbote-mbote, kana yandi ke tuba mbote-mbote, kana yandi ke sadila bankumbu mpe biyingilu ya yandi mbote-mbote, mpe nionso yina, mpe ba adjectif. Mingi kati ya bawu kuzaba ve yina bawu kele, kasi yandi ke zinga na Kiziba kaka mutindu mosi, beno me mona, mutindu mosi.

⁸³ Yawu ke tula ntima na masa ya mvula ve, samu na kufulusa yawu, to ba reveil yayi awa, samu na yawu. Yawu fwana sala mutindu yina ve, samu ngolo ya yandi mpe bunkete ya yandi kele na kati ya yandi mosi. Yina ke kisika Ndinga kele, Ngolo ya Yandi Mosi! Kana muntu mosi kundima Yawu na kati ya ntima ya yandi, Ya ke na bunkete ya Yawu. Ya ke na ngolo ya Yawu. Ya ke na kati ya Ndinga Yawu mosi, mpe ke basisa Luzingu.

⁸⁴ Na ntangu Israel kwendaka ntama ya Yawu, bawu kotaka na mpasi. Na ntangu nionso bawu kwendaka ntama ya Yawu, bawu kotaka na mpasi.

Beto ke sala mutindu mosi bubu yayi. Na ntangu reveil mosi ke kwenda ntama na Yina, ya ke vwanda mbote ve. Ya ke tobula yawu mosi mwa mazanga ya masa, mpe, to mwa mabulu ya masa yina ke ninganaka ve, mpe yawu ke kwenda kuna.

⁸⁵ Kasi Yandi sadisaka bawu ntangu nionso. Kuniunguta kuna na Nzadi Mungwa, na yawu bawu bandaka na kuniunguta . . . Ntete, na nionso, Yandi silaka yawu, mpe salaka nsilulu mosi. Yandi lendaka vtutula bawu kuna na mbala mosi, na mutindu ya beto ya kumona yawu; kasi Yandi silaka na kunata bawu kuna.

Yinki Yandi salaka? Na bana ya Israel, Yandi pesaka bawu Dikunzi ya Tiya mpe nionso yina, samu na kundimisa, profete ya bawu. Mpe bawu nataka bawu kuna tii na nzadi. Mpe, ntangu nionso, mpasi ke telemina Yawu. Mpe awa kwisaka Pharaon na makesa ya yandi. Mpe beno zaba yina Nzambi salaka? Yandi zibulaka kaka nzadi mbwadi yina, dibulu ya masa yina ke ninganaka ve.

Nzadi Mungwa kele kima ya kulutila kufwa na yinza. Ya ke ya kufwa ya kieleka. Yawu ke ninganaka ve. Kima mosi ve lunga zinga na kati ya yawu.

Mpe Yandi zibulaka yawu mpe tulaka bawu na kimpwanza, na simu yina yankaka. Yandi nataka bawu na kisika yina bawu lendaka kangama ve na kima ya mutindu yina.

⁸⁶ Na ntoto ya kuyuma, bawu monaka ti bawu lungaka tula ntima na batanki ve; yawu nionso kuyumaka. Bawu monaka ti, bawu kwendaka na dibulu ya masa mosi na yankaka. Na ntangu bawu vwandaka na ntoto ya kuyuma, bawu vwandaka pene-pene ya lufwa, samu na nsatu ya masa. Mpe bawu lendaka kwenda na tanki yayi awa, kiziba mosi; yawu yumaka. Bawu kwendaka kisika yankaka; yawu yumaka. Bawu banzaka diaka ve ti bawu lungaka diaka kuzwa masa ya kunwa.

Mpe na kisika mosi ya mpamba-mpamba kuna na ntoto ya kuyuma, bawu zwaka masa. Yawu vwandaka na ditadi. Yawu vwandaka na ditadi. Kisika mosi ya mpamba-mpamba yina muntu lendaka kuzwa masa ve, na ditadi mosi ya kuyuma na kati ya ntoto ya kuyuma. Kasi, beno me mona, Nzambi ke salaka mutindu yina. Na kisika mosi ya mpamba-mpamba, na mutindu ke salamaka ve. Yawu yina beto ke vwandaka na yawu ntangu nionso.

⁸⁷ Bawu ke banza ti beno fwana vwanda na ba denomination ya nene, kisika mosi, mpe beno bika bawu kwisa na kintwadi mpe bawu vwanda na kimvuka ya nene ya bantu yina ke na mubulu, mpe nionso yina, mpe bawu vwanda na bamafunda ya bantu ke zinga na kintwadi, mpe nionso *yayi*, samu na kuvwanda na reveil mosi.

Na bambala mingi Nzambi ke baka muntu mosi ya nkulu mbala yankaka yina zaba ve ABC ya yandi, mpe kaka na kati ya bantu yina me longukaka ve mpe yina zaba ve kusala luswaswanu ya diboko ya bawu ya kibakala na yina ya kikento, Yandi lunga basisa reveil mosi yina ke ningisa yinza. Yandi salaka yawu na ntangu ya Jean. Yandi salaka yawu na ntangu ya ba profete. Mosi ve kati ya bawu, na mutindu beto zaba, yina longukaka, kasi Nzambi lendaka baka bawu mpe kusala kima mosi na nzila ya bawu.

⁸⁸ Bamasa basikaka na Ditadi yayi. Yandi vwandaka Ditadi. Mpe Yandi tumaka Ditadi, mpe ba lendaka bula yawu. Mpe Yandi pesaka masa mingi ya kukondwa mvindu, ya madidi, ya bunkete na bantu yina lendaka kunwa. Yandi vulusaka muntu nionso yina lendaka kunwa Yawu. Mbandu mosi ya kulunga na Jean 3:16.

*...Nzambi zolaka mingi yinza, ti yandi tindaka
Mwana ya yandi mosi kaka ya luzolo, . . . samu ti muntu
yina ke kwikila na yandi kufwa ve, kasi yandi lenda
kuzwa luzingu ya kukonda nsuka,*

⁸⁹ Nzambi bulaka Ditadi yina, na Calvaire. Lusambusu ya beto kubwaka na zulu ya Yandi, ti na Yandi ke kwisa Mpeve ya Luzingu yina ke pesa beno na munu Luzingu ya Kukonda nsuka. Yina ke kingana ya kufwanana na Yawu, kuna na ntoto ya kuyuma.

⁹⁰ Bawu lendaka benda ve, kutimuna, kupompa, to konso kima yina; kaka kukuma kitini ya Yandi na nzila yandi pesaka, ya ofele. Kasi, bawu lendaka basisa yawu na kiziba mosi ve. Bawu lendaka benda yawu na kantini mosi ve. Bawu vwandaka ve na nsatu ya treuil samu na kubaka yawu. Bawu lendaka kuma kaka kitini ya yawu.

Mpe yawu yina beto ke na yawu nsatu bubu yayi. Beno fwana kota na kima mosi ve. Beno fwana kwenda fukama ve na autel mpe kusala kima mosi, kupompa yawu. Beno fwana vutukila mpova mosi ve mbala mingi mpe mbala mingi mpe mbala mingi, tii kuna beno ke kota na mubulu ya ndinga. Kima mosi kaka beno fwana sala kele beno kuma kitini ya Yandi, na ofele, na nzila yina Nzambi pesaka. Kupompa ve, kupusa ve, kima mosi ve; baka Yawu kaka, ya ofele. Beno ke na kima ya kusala ve; beno kuma kaka kitini ya Yawu. Yina zola tuba ti, beno kwikila Yawu kaka. Yawu yina kaka mu lunga tuba samu na yawu.

Bawu vwandaka na kima ya kusala na yawu ve. Bawu vwandaka na nsatu ya kutimuna yawu ve. Bawu vwandaka na nsatu ya kufukama ve mpe kudila mpimpa ya muvimba, samu na yawu. Bawu kumaka kaka kitini ya yawu; ba bulaka yawu mpe kumaka ya kukubama. Ya kieleka.

⁹¹ Ntangu yayi mu ke tala muntu mosi, yina me vwanda kuna na manima awa. Mu ke bambuka ti mu tubaka na yandi mambu

yina, na kidikilu mosi ya nkulu kilumbu mosi, pene-pene ya sika ya madia ya baniamana.

Mpe yandi tubaka, “Kasi mu ke kima mosi ve.”

⁹² Mu tubaka, “Mu zaba ti nge ke kima mosi ve.” Mpe mu tubaka, “Munu mpe, ke kima mosi ve.” Kasi mu tubaka, “Nge ke tala na yina nge kele. Mpe yambula kutala yina nge kele, mpe tala na yina Yandi kele.”

Yandi tubaka, “Kana mu lunga bika makaya yayi, Mpangi Branham, mu—mu—mu ke vwanda Muklisto.”

⁹³ Mu tubaka, “Kubika yawu ve. Nge ke meka na kuvwanda mbote na ntwala nge kwisa na Yandi. Yandi kwisaka ve samu na kuvulusa bantu ya mbote; Yandi kwisaka samu na kuvulusa bantu ya yimbi yina zabaka ti bawu vwandaka bantu ya yimbi.”

Yandi tubaka, “Mbote . . .”

Mu tubaka, “Wa, nge zola kwenda na difelo ve, mutindu yina?”

Yandi tubaka, “Ve.”

⁹⁴ Mu tubaka, “Mbote, nge fwana kwenda kuna ve. Yandi fwaka samu nge kwenda kuna ve.”

Yandi tubaka, “Yinki mu fwana sala?”

Mu tubaka, “Kima mosi ve. Yawu yina kaka.”

Yandi tubaka, “Kasi kana mu lungaka . . .”

⁹⁵ Mu tubaka, “Nge yina me vutuka, na makaya yina diaka. Yambula kubanza na makaya yina. Bambuka moyo ti, banza kaka na Yandi, yina Yandi salaka, yina Yandi kele; kubanza ve na yina nge kele. Nge ke mbote ve; mpe nge me vwandaka mbote ata fioti ve, mpe ke vwanda mbote ata fioti ve. Kasi, yina Yandi kele, Yandi Mosi kaka!” Mpe mu tubaka, “Ntangu yayi, kima mosi nge fwana sala; kana Yandi bakaka kisika ya beno kuna, beno ke ndima yina Yandi salaka. Kima mosi beno fwana sala kele kundima yawu.”

“Samu na yawu,” yandi tubaka, “yawu yina kaka. Mu ke sala yawu.”

⁹⁶ Mu tubaka, “Masa yawu yayi.” Beno me mona? Mu nataka yandi awa mpe botikaka yandi na Nkumbu ya Yesu Klisto.

Bantu ya dibuta ya yandi me vwanda awa, mpe mu—mu zaba ti bawu monaka yawu ya ngitukulu samu mu salaka mutindu yina, kasi mu zabaka yina mu vwandaka sala. Mu monaka kima mosi ya kisina na muntu yayi. Mu lendaka mona yawu kuna, mpe mu bakaka yandi mpe botikaka yandi na Nkumbu ya Mfumu Yesu.

Mpe, na ntangu beto salaka mutindu yina, ntama mingi ve na manima mu kwendaka na yinzo ya mwana ya yandi. Beto monaka vision ya yinti yina bukanaka na kisika mosi,

mpe muntu mosi kubwaka, mpe bukanaka mukongo. Mpe bawu nataka yandi na hôpital. Mpe na mpimpa yina Mfumu monisaka yawu, na munu, ti yawu vwandaka nsuka ya makaya.

Na yawu kilumbu yina landaka yandi vwandaka na nsatu ya makaya. Mu tubaka, “Mu ke sumbila yandi carton mosi mpe mu ke natila yandi yawu. Beno tala mpe beno mona ti, bilumbu ya yandi ya makaya me mana.” Yandi nwaka diaka ve makaya kubanda kilumbu yina, mpe yandi vwandaka diaka ve na nsatu ya yawu kubanda kilumbu yina. Nzambi!

⁹⁷ Beno tala, kima ya ntete beno fwana sala kele kukwisa na Kiziba yina. Beno kwisa na Masa yina, beno ke bakula ti beno lunga sala kima mosi ve. Yawu ke yina Yandi salaka samu na beno. Beno lenda timuna ve; beno lenda pompa ve; beno lenda yambula *yayi* ve; beno lenda yambula *yina* ve. Kima mosi kaka beno fwana sala kele kukwisa kuna mpe beno kunwa. Yawu yina kaka. Kana beno ke na nsatu ya masa, beno kwisa kunwa!

⁹⁸ Ntangu yayi, Yandi vwandaka Ditadi. Nzambi bulaka Yandi samu na beto, mpe Yandi basisaka diaka masa ya kukondwa mvindu, mpe ya bunkete. Yandi ke sala yawu diaka, bubu yayi, na konso muntu yina ke kwikila. Yayi ke lemvo ya Yandi, ya kieleka, samu na bantu ya Yandi, beto.

⁹⁹ Kele na kima mosi ya kufwanana na yina kuna, yina me fwanana na bantu ya bubu yayi, bawu me kubama na kubaka yina bawu lunga kuzwa, kasi bawu zola vutula kisalu mosi ve samu na yawu. Israel vwandaka ya kukubama na ku—kunwa na ditadi yina kuna, kasi bawu zolaka ve kupesa na Nzambi kisalu ya Yandi yina me lunga samu na Yandi.

¹⁰⁰ Mpe Yandi ke pesaka beto kisalu mosi ntangu nionso. Beno zaba, beto fwana pema ve kukondwa Yandi. Beto lunga pema ve kukondwa kisalu ya Nzambi. Tala mutindu beto ke tula bantima ya beto na Yandi. Mpe, ntete, ya ke pasula beto na ntangu beto ke meka na kusala yawu, kusala kima mosi samu na Yandi. Yandi ke lomba beto na kusala kima mosi, kukwenda tala muntu mosi, kukwenda sambidila samu na muntu mosi, kukwenda sadisa muntu mosi, beto ke pasuka, na kusala yawu. Kasi beto ke zola ve kusala kima mosi samu na Yandi.

¹⁰¹ Dikebi ya Yandi vwandaka, “Bawu me bika Munu, Ndinga; mpe bawu me ndima dibulu ya masa ya kutobuka, bawu me yingisa. Me ndima . . . Bawu me bika Munu, Kiziba ya Luzingu, Kiziba ya Masa ya Luzingu; mpe bawu ke na nsatu mpe ke nwa na dibulu ya masa yina ke ninganaka ve.” Beno lunga banza na yina?

¹⁰² Beno lunga banza samu na muntu mosi ntangu yayi, kuna, na kutala ti kele na dizanga ya masa ya kisina *awa* yina ke basisa masa yina ya kitoko, ya calcaire, mbala mosi kuna na kati ya ntima ya matadi, kuna na nsi ya zelo, mpe nionso yina, ya madidi mpe ya mbote mutindu yawu lunga vwanda; mpe yina ke zola

kunwa na dibulu ya masa yina kuna, masa yina ke kulumuka na muludi ya kidikilu, mpe ya batenta, mpe ya bayinzo nionso ke pene-pene? Mpe ba me tula yawu kuna na dibulu ya masa yina, sika wapi masa ke benda nionso na dibulu ya masa yina, kubanda na kidikilu, yinzo ya bandeke mpe yinzo ya baniamama, mpe bima nionso yina ke kulumuka na dibulu ya masa, mpe na yawu beto zola ndi- . . . beto ke nwa kuna na sika kukwenda na dizanga ya masa yina ya kisina? Ke vwanda na kima mosi ke tambula mbote ve na yintu ya muntu yina. Ya kieleka.

¹⁰³ Mpe na ntangu bakala to kento mosi ke simbisa denomination mosi, yina ke pesa muswa na kuzengisa bansuki, kulwata bakupe, ba maquillage, bima yankaka nionso, mpe mwa manaka mosi, mpe kisaka-saka yayi nionso kuna, mpe lunga kwenda na bowling, mpe—mpe buzoba yayi nionso kuna, mpe lunga ndima yawu; mpe ke zola mingi bima yayi kulutula Ndinga ya Nzambi ya nkulu yina ke zenga mpe ke sungika, mpe ke soba bakento na bamama, mpe ke baka bawu mpe ke lwatisa bawu mbote-mbote mpe samu na kuzinga mbote-mbote, yina ke nata beno ntama ya makaya mpe tumbaku, mpe na kuzenga ndefi mpe kusinga, mpe kuvuna mpe kuyiba, ntama ya beno, mpe yinza nionso ntama ya beno, mpe ke pesa beno Kima yina kele kiese ya kulunga. Samu na yinki kento mosi to bakala mosi ke kwenda na kima ya mutindu yina mutindu lusadusu? Beno lunga kuzwa lusadusu kuna?

¹⁰⁴ Yinki mutindu beno lunga kuzwa masa ya mbote ya kunwa na dibulu ya masa yina ke ninganaka ve? Samu na yinki muntu mosi . . . Kana muntu mosi kukwenda na dibulu ya masa yina ke ninganaka ve samu kubaka masa ya kunwa, na ntangu dizanga ya masa ya kisina me zibuka, beno lunga tuba, “Kele na kima mosi ke tambula mbote ve na yintu ya muntu yina.”

Mpe kana kento mosi to bakala mosi kukwenda na kisika ya mutindu yina samu na kuzwa lusadusu, kele na kima mosi na kimpeve ke tambula mbote ve na muntu yina. Bawu zola Ndinga ve. Yawu ke talisa ti nkadulu ya bawu kele kaka ya dikototo, to ya ditaka-taka, to ya kima yankaka, ya kieleka, kima mosi ya nkadulu yina ke zolaka basini ya masa yina ke ninganaka ve, samu bima ya mutindu yina ke zingaka ve na basini ya Masa ya madidi. Bawu ke sala yawu ve; ya ke Masa ya madidi. Bawu lunga sala yawu ve.

¹⁰⁵ Ntangu yayi, dikebi vwandaka, “Bawu me bika Yandi.” Mpe bubu yayi bawu me sala kima ya mutindu mosi.

Ntangu yayi beno tala kento yina na dizanga ya masa. Mbote, yandi kwisaka na dibulu ya masa ya Jacob, mpe yandi vwandaka baka masa kuna ntangu nionso, na dibulu ya masa ya Jacob. Kasi dibulu ya masa ya Jacob, denomination mosi, mutindu beto lunga bokila yawu, samu yandi timunaka mabulu tatu ya masa; mpe yayi vwandaka mosi yina yandi timunaka. Ntangu yayi,

yandi vwandaka na disolo ya nene. Yandi tubaka, “Ntangu yayi, tata ya beto timunaka dizanga ya masa yayi, Jacob. Yandi nwaka masa ya yawu, mpe bangombe ya yandi kunwaka masa ya yawu, mpe nionso yina. Yina vwandaka mbote mingi ve?”

¹⁰⁶ Yandi tubaka, “Kasi masa yina nge ke baka kuna, nge ke vwanda diaka na nsatu ya masa, nge ke vutuka diaka awa samu na kubaka yawu. Kasi,” tubaka, “Masa yina Mu ke pesa na nge kele Kiziba mosi, Geysers ke basika na kati ya yawu, mpe nge ke kwisaka awa ve samu na kubaka Yawu. Yawu kele awa na nge.”

¹⁰⁷ Beno bambuka moyo. Na ntangu yandi monaka ti Kiziba yina ya Masonuku tubaka na yandi, na nzila ya kidimbu ya Masonuku yina yandi vwandaka sosa, yandi bikaka systeme yina ya denomination ya Jacob mpe vutukaka na yawu diaka ve, samu yandi monaka Ditadi ya kieleka. Beno me mona? Yandi kwendaka nswalu nionso na mbanza. Yandi sukisaka na yina me tadila disumu. Yandi vwandaka diaka ve kento ya masumu. Yandi tubaka, “Beno kwisa, tala Yina mu me mona, Muntu Yina me tuba na munu mambu yina mu salaka. Yayi ke Klisto ve?” Yandi . . . Dibulu ya masa yina vwandaka mbote; yawu lungisaka kikuma ya yawu. Ntangu yayi yandi vwandaka na Kiziba ya kieleka. Dibulu ya masa vwandaka mbote tii kuna Kiziba ya kieleka zibukaka. Kasi na ntangu Kiziba ya kieleka kwisaka, dibulu ya masa yina zimbisaka ngolo ya yawu. Yandi monaka ti vwandaka na kisika ya mbote mingi samu na kunwa masa.

¹⁰⁸ Mpe kele na kisika ya mbote mingi. Kele na kisika ya mbote mingi, mpe kati na Klisto. Na Santu Jean 7:37 mpe 38, Yesu tubaka, na nkinzi ya nsuka ya ba tabernacles, “Kana muntu mosi kele na nsatu ya masa, yandi kwisa na Munu, mpe yandi kunwa.”

Bawu nionso vwandaka na kiesa. Bawu vwandaka na yinto mosi ya masa yina vwandaka basika na autel, mpe—mpe bawu vwandaka kunwa yawu, na mukumbu, ya—ya nkinzi. Mpe yandi tubaka, “Batata ya beto na ditadi ya kimpeve kuna na ntoto ya kuyuma.” Beno me mona, bawu timunaka bawu mosi dibulu ya masa mosi, mwa masa yina ke ninganaka ve yina bawu pompaka kisika mosi kuna, mpe yina bawu basisaka kuna na tempelo. Mpe bawu nionso vwandaka pene-pene ya masa yayi mpe nwaka yawu, mpe bawu tubaka, “Bamvula mingi me luta, batata ya beto kunwaka kuna na ntoto ya kuyuma.”

Yesu tubaka, “Mu ke Ditadi yina vwandaka na ntoto ya kuyuma.”

Yandi tubaka, “Beto diaka mana ya Zulu, mpe Nzambi nokisaka yawu.”

¹⁰⁹ Yandi tubaka, “Mu ke Mana yina.” Yandi, Kiziba yina, vwandaka ya kutelema na kati ya bawu. Dimpa yina ya Luzingu vwandaka ya kutelema na kati ya bawu.

Mpe bawu vwandaka zola Yawu kaka ve. Bawu vwandaka zola dibulu ya bawu ya masa; samu, muntu salaka *yayi*,

mpe Nzambi salaka *Yina*. Luswaswanu yawu yina. Bawu mosi timunaka mabulu ya masa!

¹¹⁰ Yandi tubaka, “Kana muntu mosi kele na nsatu ya masa, yandi kwisa na Munu, mpe yandi kunwa.” Yandi ke Kiziba yina.

Mpe Masonuku ke tuba ti, “Banzadi ya Masa ya moyo ke basika na kati ya yandi.” Oh, Yandi ke dizanga ya masa yina ya kisina! “Banzadi ya Masa ya moyo ke basika, na kati ya yandi, to kati ya ntima ya yandi.”

¹¹¹ Yandi ke Ditadi yina, yina vwandaka na . . . Yina vwandaka Ditadi ya Agar, na ntangu ya mpasi; na ntangu mwana ya yandi vwandaka pene-pene ya lufwa, na ntangu ba basisaka yandi na nganda ya mbanza, mpe yandi vwandaka kuna na Ismael ya leke. Masa ya yandi, na dibulu ya masa yina yandi vwandaka nata, nionso manaka. Yandi kitisaka Ismael ya leke na ntoto; mpe kwendaka ntama kuna, na mwa bitamina, mpe dilaka, mpe, oh, samu yandi zolaka ve ti mwana kufwa. Mpe na mbala mosi, Wanzio ya Mfumu tubaka, mpe yandi monaka Beer- . . . Beersheba, dizanga ya masa yina vwandaka basika kuna, mpe ke basika kaka tii bubu yayi. Yandi vwandaka Beer-Beersheba ya Agar, Ditadi yina kuna na ntoto ya kuyuma.

¹¹² Yawu vwandaka awa na Kiziba ya kifuluka na Menga, kilumbu yina, ya kutelema kuna na tempelo. [Kisika ya mpamba na bande—Mu.] . . . ntangu ya kitembo. Na Zacharie kapu 13, Yandi vwandaka Kiziba yina zibukaka na yinzo ya David, samu na kukatula mvindu, mpe samu na kukatula (disumu) mvindu ya disumu. Yandi vwandaka Kiziba yina. Mpe na Psaume 36:9, Yandi vwandaka Kiziba ya Luzingu ya David. Yandi ke kaka Kiziba yina na yinzo ya David.

Mpe Yandi ke yina ya nsoniki, na kati ya ntima ya yandi kuna. Nsoniki tubaka:

Kele na Kiziba mosi ya kifuluka na Menga,
Yina me basika na misisa ya Emmanuel,
Kana bansumuki kukota kuna,
Bawu ke zimbana kubwa ya bawu nionso.

Yandi ke Kiziba yina ya Luzingu, Kiziba ya Masa. Yandi ke Ndinga ya Nzambi.

¹¹³ Bantu ya bilumbu yina yambulaka Yandi, Ndinga ya kieleka, Masa ya Luzingu; mpe timunaka bawu mosi mabulu ya masa ya ba denomination; mpe, diaka, bawu timunaka, mpe tobulaka!

¹¹⁴ Ntangu yayi beto ke mona ti, bawu vwandaka na mabulu ya masa ya kutobuka. Mpe dibulu ya masa yayi fulukaka na mikolobo ya kukondwa kundima, na lufundu ya kukondwa kundima, na manaka ya luzabu, mpe nionso yina, yina me telemina bansilulu ya Nzambi. Bawu ke bantu yina ke tulaka ntembe na Ndinga.

¹¹⁵ Ntangu yayi, mabulu ya masa yayi bawu vwandaka na yawu, Biblia me tuba ti, yawu vwandaka “ya kutobuka.” Dibulu ya masa ya *kutobuka* kele dibulu ya masa yina “ke basisa masa,” mpe yina ke nokisa masa. Yinki yawu ke sala? Yawu ke nokisa masa na poto-poto ya nsambulu yina ba ke bokila Conseil Mondial ya Mabuundu. Yina ke kisika dibulu ya masa ya kutobuka ke twadisa bawu, bawu nionso samu bawu me yambula Yandi, mpe me . . . Kiziba ya Masa ya moyo; mpe salaka mabulu ya masa yayi.

¹¹⁶ Bawu ke tobula ba systeme ya nene ya luzabu ya seminere, ya lukolo, mpe nionso yina. Yina ke mutindu ya mabulu ya masa bawu ke tobula bubu yayi, ti muntu fwana vwanda Docteur na Philosophie, to Docteur na Droit, to Licencié na Lettres, to kima ya mutindu yina, na ntwala yandi kwenda longa. Mabulu ya masa yina me fuluka na theologie yina me salama na maboko ya bantu. Bawu ke kotisa bawu na balukolo yayi ya nene ya luzabu, mpe bawu ke kotisa bawu theologie ya bawu yina me salama na maboko ya bantu, mpe bawu ke tinda bawu na yawu. Yinki kilumbu yayi beto ke zinga, mabulu ya masa yina me salama na maboko ya bantu! Diambu kele ve . . . Na ngitukulu ve ti kima me kuma ya nsudi ya yimbi, oh, la la, ya ke samu bantu ke nwa kuna.

¹¹⁷ Mpe na ntangu bantu ke zola vwanda na kiese bubu yayi, yinki bawu ke sala? Bantu, na kisika kundima kiese ya Mfumu, bawu ke baluka na masumu, samu na kuzwa kiese. Bantu yina ke kwenda na bayinzo-Nzambi mpe ke tuba ti bawu ke misadi ya Klisto, na ntangu bawu ke kota na kidi-kidi bawu ke pelisa dikaya. Mpe na ntangu bawu—na ntangu bawu zola ku—kusakana, bawu ke lwata bilele ya bawu ya yimbi mpe ke basika mpe ke zenga matiti na ntangu babakala ke luta kuna, samu ba bokila bawu na mwita. Bawu ke sala nionso yina samu na kuzabana mingi. Bawu zola fwanana na ba vedette ya cinema. Yawu yina kiese ya bawu.

Mpamba ve, Yesu tubaka, “Mu ke yina me lunga samu na bawu.”

Kikuma ke sala ti bawu kwenda na bima yina kuna, samu bawu ke zola ve kunwa na Kiziba yina. Bawu me pesa Yawu mukongo. Bawu zola kunwa na Yawu ve. Bawu ke kota bawu mosi na systeme mosi me salama na maboko ya bantu, mwa mabulu ya masa yina me fuluka na bima yina ke ninganaka ve, kuna bawu lunga kwenda na ntwala mutindu yina.

¹¹⁸ Mazono, beto nataka bana kuna na nzadi. Mu banza ti yawu vwandaka Kilumbu ya sambanu na suka. Beto kwendaka kuna; Billy vwandaka loba mbisi na masuwa. Mpe beto nataka bana kuna, mutekolo ya munu ya leke mpe bayankaka, mwana ya munu ya kento, mpe mwana ya munu ya bakala ya leke, mpe beto kwendaka na nzadi samu na ku—kutambula na masuwa. Beto lungaka tambula na masuwa ve na nzadi samu na bantu ya

masumu, ya mvindu, ya nyanzi yina vwanaka kuna na nzadi, ndambu kinkonga mpe yina vwanaka sala nionso ba me zola. Masuwa mosi lutaka pene-pene ya beto, na nkangu ya bana-babakala ya bamvula kumi na zole, kumi na yiya, bawu nionso vwanaka na milangi ya biere na maboko ya bawu, na makaya. Ba ke bokila yawu “kusakana.” Oh, la la! Bantangu yikwa yinza yayi lungaka zinga diaka, na systeme ya mutindu yayi?

¹¹⁹ Na yawu samu na kukatula dibanza yina ti na ntangu bawu ke fwa bawu ke kwenda na difelo, bawu ke sala ti, bawu ke kukikotisa na mosi ya mabulu yayi ya masa yina me salama na maboko ya bantu. Mpamba ve ti bantu ya mutindu yina kele mosi ya dibulu ya masa yina. Ya ke kima yankaka ve kasi nkangu ya mataka-taka ya mvindu ya yinza, ya busoto. Bawu ke vukana bawu mosi na yina samu, mutindu mama ya munu vwanaka tuba, “Yina me fwanana ke vukanaka.” Bawu ke kwisa ve na Kiziba samu bawu sukuka na luzingu ya bawu yina ya masumu. Bawu zola zinga kuna, mpe kundima kaka ti bawu ke Baklisto. Samu na yinki? Bawu me pesa Yandi mukongo, Kiziba ya kieleka ya kiese, ya Luzingu, ya Luzingu ya kulunga mpe ya kiese. Kikuma yawu yina bawu ke sala yawu, samu ti bawu zola kota kuna. Bawu ke na bantu ya mutindu yina ke kwikila na bima ya mutindu yina.

¹²⁰ Awa ntama mingi ve, Mpangi Fred mpe munu, mpe Mpangi Tom, kimvuka ya muvimba beto kwendaka na dibuundu ya ba Baptiste yina zabana mingi na mbanza ya Tucson, samu na kutala kana beto lungaka mona ve mwa kima mosi yina lendaka pesa beto mbala yankaka nsatu mosi ya kitoko. Mpe longi tubaka kima mosi samu na yina me tadila bantu ya Egypte, na ntangu bawu basikaka bawu vwanaka kudia ayi mpe nionso yina, bawu zolaka vutuka diaka samu na kudia yawu. Yandi tubaka, “Yina ke kima mosi me fwanana na bantu ya bilumbu yayi.”

Mpe, beto, beto nionso tubaka, “Amen!” Mu me monaka ata fioti ve nkangu ya bantu ya mutindu yina! Dibundu ya muvimba zimbanaka na kutala longi mpe bawu balukaka samu na kutala nani tubaka “amen.” Bawu kumaka na boma mosi ya nene. Bawu zabaka ve yina yawu vwanaka.

Mpamba ve, David tubaka, “Beno boka na kiese samu na Mfumu. Beno kumisa Yandi na harpe! Beno kumisa Yandi na mikunga! Nionso yina ke pema kukumisa Mfumu. Mpe beno kumisa Mfumu!” Nzambi ke sepela na kati ya bantu ya Yandi. Bayina nionso kele na luzabu, kutuba, “Amen,” na ntangu kima ya kieleka me tubama.

¹²¹ Samu na yinki ve kubika systeme yayi mpe mabulu ya masa yayi ya yinza, samu na system ya kwikama ya Nzambi, yina ke dizanga ya masa ya kisina, Yesu Klisto? Samu na yinki ve kubaluka na Yandi, mpamba ve ti Nzambi ke kibumbulu ya beto ya kufwana ya kiese, kibumbulu ya beto ya kufwana ya lukumu,

kibumbulu ya beto ya kufwana ya kiese? Kulembama ya misisa ya munu ke katuka na Nzambi.

Na ntangu mu ke na kidi-kidi, mu ke zwa kiese ya munu na Klisto, na makaya ve, na bima ya yinza ve, na kundima mwa ba credo ve; kasi na kumona Yandi, Ndinga ya nsilulu yina Yandi tubaka, “Kana Mu kwenda, Mu ke kwisa baka beno diaka.” Mu ke zwa kiese ya munu na yina. Yandi ke Kiese ya munu.

¹²² Bubu yayi bawu ke tuba ti, kukota na bima yayi mpe kusala Conseil Mondial ya Mabuundu, ti bawu ke kuzwa kisika ya mbote mingi samu na kuzinga. Na dibanza ya munu ya kieleka, bawu ke sala kisika ya mbote mingi samu na kusala masumu. Yina ke kaka . . . Konso kima kele kaka disumu, na mutindu nionso; samu na kuzinga ve, kasi samu na kufwa. Bawu ke sala kisika ya bawu ya kuvwanda, to, samu na kusumuka, na kisika ya kuzinga.

¹²³ Konso kima yina, na nganda ya Yesu Klisto mpe Ndinga ya Yandi ya Luzingu, kele dibulu ya masa ya kutobuka. Konso kima yina ke meka na kubaka kisika ya Yawu; konso kima yina beno ke meka na kusala samu na kuzwa ngemba, konso kima yina beno ke meka na kusala samu na kuzwa lusadusu, mutindu nionso ya kiese yina beno ke meka na kuzwa na kima yina yankaka, mutindu kilandi ya Yawu, kele dibulu ya masa ya kifuluka na mvindu. Yandi ke pesaka kiese ya kulunga.

¹²⁴ Mu ke bambuka moyo awa, na été mosi bamvula mingi me luta, mu basikaka na kielo ya manima. Kuvwandaka na mwana-bakala mosi ya mayele ya yimbi kuna yina tubaka na munu, yandi tubaka, “Nge zaba, kikuma nge ke tubila ntangu nionso bakento mutindu yina, samu ba ke lwata bakupe mpe bima nionso yina,” yandi tubaka, “samu nge ke mbuta-muntu.” Yandi tubaka, “Kikuma yawu yina.”

Mu tubaka, “Tala awa. Nge ke na bamvula yikwa?”

Yandi tubaka, “Makumi zole na sambwadi.”

¹²⁵ Mu tubaka, “Na ntangu mu vwandaka diaka ntwenia mingi kulutila nge, mu longaka kaka mutindu mosi.”

Mu monaka Kiziba ya kiese. Yandi ke kitini ya munu. Amen! Na ntangu nionso Yandi ke lungisa bansatu nionso, yawu yina ke kitoko. Yina ke—yina ke ya munu . . . Yina ke dibanza ya munu, kutala Yandi, kutala mbote-mbote diboko ya Yandi ke sala mpe kumona yina Yandi ke sala. Mu zaba diaka ve yinto yankaka!

Oh, yinto ya kitoko
Yina ke sukula munu mpembe mutindu mvula
mpembe;
Mu zaba yinto yankaka ve,
Kaka Menga ya Yesu.

Kele na Kiziba mosi ya kufulukuka na Menga,
Yina me basika na misisa ya Emmanuel,
Kana bansumuki kukota kuna,
Bawu ke zimbana kubwa ya bawu.

126 Mu ke tuba na beno ti, mu zaba yinto yankaka ve kasi Kiziba yina. Yawu sukulaka munu na ntangu mu vwandaka mvindu. Yawu sukulaka munu, samu mu zola zinga pene-pene na Yawu, samu na kunwa Masa yayi ya madidi yina ke fulusa moyo ya munu na kiese.

Mu lunga vwanda ya kulemba mingi, mpe kuwa ti mu lunga simba diaka ve. . . round yankaka, mu lunga kwenda kisika yankaka ve; na yawu mu lunga fukama mpe kutula musapi na nsilulu mosi, mpe kutuba, “Mfumu Nzambi, Nge ke ngolo ya munu. Nge ke kiese ya munu. Nge ke nionso samu na munu.” Mu lunga wa Kima mosi ke mata na kati ya munu kuna. Mu ke baka diaka kikesa.

127 Mu me lutisa bamvula makumi tanu, na ntangu mu ke vumbuka na suka mosi, beno zaba mutindu yawu kele, na mpasi beno lunga basisa dikulu mosi na mbeto. Oh, la la, beno lunga sala yawu ve; mpe muntu mosi ke bula, na kielo, to Billy ke tuba na munu ti kele na diambu mosi ya nswalu-nswalu, mu ke kwenda kisika mosi kuna. Mpe mu ke banza, “Yinki mutindu mu lunga sala yawu?” Mu ke meka na kutula dikulu mosi na nganda.

Mu ke banza, “Nge ke Kiziba yina me fuluka na ngolo ya munu. Amen! Ngolo ya munu mpe lusadusu ya munu ke katuka na Mfumu. Nge ke dizanga ya munu ya masa ya kisina! Nge ke kintwenia ya munu! ‘Bayina nionso ke tulaka ntima na Mfumu ke vutula ngolo ya bawu; bawu ke pamuka mutindu mpongo; bawu ke baka ntinu, mpe ke lemba ve; bawu ke tambula, mpe ke lemba ve.’ Mfumu Nzambi, yayi ke kisalu ya munu, na kukwenda. Mu me bokilama na kuvwanda na kisika ya munu ya kisalu.” Beno zaba kima ya ntete, Kima mosi ke banda na kuningana na kati ya munu.

128 Kilumbu mosi, na mwa kisika mosi kuna, mu vwandaka na lukutakanu mosi kuna na Topeka, Kansas; kuvwandaka na mwana-bakala mosi, longi mosi ya ntwenia, mosi ya bantu ke simbisaka balukutakanu ya munu. Mpangi Roy, yina me vwanda awa, yandi ke bambuka kisika yango. Kuna, na kisika yayi ya nene, kuvwandaka na . . . Longi yayi kwendaka vwanda na nsi ya muludi ya yinzo mosi to kisika mosi kuna, kikaku ya lweka kubwaka mpe yawu finaka yandi kuna. Nkundi yayi ya leke lendaka kufwa. Foie ya yandi kutobukaka. Rate ya yandi katukaka na kisika ya yawu. Ba tonne mingi kubwaka na zulu ya yandi.

129 Mu vwandaka na madia ya suka kuna, mpe mu vwandaka tuba na kento ya munu. Mu tubaka, “Kento ya munu, nge zaba, kana Yesu vwandaka awa, nge zaba yina Yandi ke sala?” Mu

tubaka, “Na ntangu yandi simbisaka lukutakanu ya munu, ‘Mu ke kwikila Ndinga yayi,’ yandi simbisaka lukutakanu ya Klisto.” Mpe mu tubaka, “Yina ke kima ya diabulu.” Mu tubaka, “Kana Yesu vwandaka awa, Yandi lendaka tetika maboko ya Yandi ya santu na zulu ya yandi. Mwana-bakala yina zolaka beluka. Mu ke tala ve ti foie ya yandi kele ya kutobuka. Yandi ke beluka, samu Yesu ke kwenda kuna na kuzabaka ya kieleka Yina Yandi vwandaka. Yandi zabaka lubokilu ya Yandi, Masonuku vwandaka ya kusungama, yawu vwandaka ndimisa Yandi ti Yandi zabaka Yina Yandi vwandaka, mpe kele ve. . .kivudi ya ntembe ve. Yandi ke tetika maboko ya Yandi na zulu ya yandi, mpe ke tuba, ‘Mwana, beluka,’ mpe ke kwenda kuna.” Mpe mu tubaka, “Ke vwanda na bampeve ya yimbi mingi ve na difelo samu na kufwa mwana-bakala yina kuna, na ntangu yina.” Mu tubaka, “Yandi ke beluka.” Kasi mu tubaka, “Nge ke mona, cherie, Yandi vwandaka Yesu, maboko ya santu ya Nzambi.”

Mu tubaka, “Mu ke nsumuki. Mu me butuka na mpusa ya nzutu. Tata ya munu mpe mama ya munu butukaka bansumuki, mpe mu ke mbote na kima mosi ve.”

Mpe mu tubaka, “Kasi nge zaba? Kana Mfumu lenda pesa munu vision mosi mpe kutinda munu kuna, na yawu yina ke vwanda luswaswanu.” Mu tubaka, “Mu ke kwenda kuna mpe ke tetika maboko ya munu na zulu ya yandi, yandi ke basika na mbeto yina kana Yandi pesa munu vision mosi.”

¹³⁰ Na yina mu bandaka na kubanza, “Na manima ya nionso, kana yawu vwandaka vision, yinki yawu lendaka vwanda? Ya ke vwanda maboko mosi yina ya mvindu na zulu ya yandi, uh-huh, muntu mosi ke sambidila samu na yandi, na maboko mosi yina ya mvindu.”

Na yawu mu bandaka na kubanza, “Mu ke kifwani ya Yandi. Na yawu, Nzambi me mona munu ve. Menga ya Mosi yina ke ya kusungama me vwanda kuna na autel; Ya ke sambidila samu na munu. Yandi ke yina me lunga samu na munu. Yandi ke kisambu ya munu. Yandi ke Luzingu ya munu.” Mu tubaka, “Kima mosi yina ke sala ti mu tetika maboko ya munu na zulu ya yandi, na lukwikilu, samu mu tulaka lukwikilu na vision. Mpe kukondwa vision, lukwikilu yina ke sala kima ya mutindu mosi; na yawu mu lunga ndima ti mu ke kima mosi ve na munu mosi, kasi mu zaba ti Yandi ke nionso samu na munu. Yandi ke Luzingu ya munu. Yandi ke yina pesaka munu Lutumu. Denomination mosi ve kutumaka munu; Yandi tumaka munu. Alleluia! Mu ke kwenda na Nkumbu ya Yandi. Mu ke tetika maboko ya munu na zulu ya yandi.” Mu kwendaka kuna mpe tetikaka maboko na zulu ya mwana-bakala yina, mpe na nkokila yina yandi kwisaka na lukutakanu, ya kubeluka mbote-mbote. Amen!

¹³¹ Oh, yinga, Yandi ke Kiziba yina. “Mu zaba yinto yankaka ve. Kima yankaka ve kasi Menga ya Yesu!” Mu ke muntu ya

kiadi, mu ke kima mosi ve, mosi na mosi ya beto ke mutindu yina, kasi na ntwala ya Nzambi beto ke ya kulunga. Ye. . . “Beno vwanda ya kulunga, mutindu Tata ya beno na Zulu kele ya kulunga.” Yinki mutindu beno lunga vwanda mutindu yina? Samu Mosi yina ke ya kulunga ke talisa beto kuna. Kiziba yina kele ya madidi kuna, konso kilumbu. Yawu kele ve kima yina ke ninganaka ve, kasi ya madidi konso kilumbu, yina ke sukula masumu ya munu nionso. Yandi ke Kiziba yina.

¹³² Ntangu yayi samu na kusukisa, mu zola tuba yayi. Konso kima yina me swaswana na Yayi kele mabulu ya masa ya kutobuka, mpe nsuka-nsuka yina beno tulaka na kati ke basika; kana beno ke tula kivuvu ya beno nionso, ntangu ya beno nionso, mpe konso kima, na mosi ya mabulu ya masa yina ke ninganaka ve. Yesu tubaka ti yawu vwandaka mabulu ya masa ya kutobuka. Nzambi tubaka, “Yawu ke ya kutobuka, mpe yawu ke basisa yina nionso beno ke tula na kati ya yawu.” Beno ke kwenda na yawu ntama ve, samu yawu ke ya kutobuka. Samu Yandi ke nzila mosi kaka ya Kieleka, ya Luzingu, mpe ya kiese ya Kukonda nsuka, mpe ngemba ya Kukonda nsuka. Yandi ke Mosi kaka mpe nzila mosi kaka samu na Yawu. Oh, la la!

¹³³ Kiziba ya Luzingu yina ke manaka ve ya Yesu Klisto. Samu na yinki? Mpe Yandi ke Nani? Ndinga, mutindu mosi; Ndinga, Luzingu, Kiziba, “mutindu mosi mazono, bubu yayi, mpe kukonda nsuka.” Samu na mukwikidi ya kieleka, Yandi ke kiese ya yandi ya mazulu, Luzingu ya yandi ya mazulu. Kiese ya yandi ya mazulu kele na Klisto. Na kupompa ve, na kubenda ve, na kukota ve, na kumanisa nionso ve; kaka kukwikila mpe kupema. Tala yina Yandi kele samu na yina ke kwikila.

¹³⁴ Mutindu mosi na tata ya beto Abraham; yandi bendaka ata fioti ve, yandi tekitaka ata fioti ve, yandi vwandaka na boma ata fioti ve. Yandi vwandaka na Ndinga. Yandi lalaka na ntulu ya El Shaddai. Na ntangu Abraham kumaka na bamvula nkama mosi, Nzambi monikaka na yandi, mpe tubaka, “Mu ke ya Ngolo nionso.” Mpova ya Hebreux kele *El Shaddai*, yina zola tuba, “Yina ke na Mabele.” “Mpe nge ke mununu, mpe ngolo ya nge me mana, kasi lala kaka na zulu ya ntulu ya Munu mpe baka madia na kubendaka ngolo ya nge na Kiziba yayi.” Amen! Yinki yandi bakaka na ntangu yandi diaka kuna? Nzutu ya malu-malu. Yandi zwaka mwana, na nzila ya Sarah. Mpe, bamvula makumi na tanu na ntwala, yandi zwaka bana sambwadi na kento yankaka.

¹³⁵ Oh, El Shaddai! Ngwisani ya Ntama ke talisa yina Yandi salaka, Ngwisani ya Malu-malu ke tuba yina Yandi ke sala. Amen! Na Ngwisani ya Ntama. . .

¹³⁶ Ntangu yayi mupepe ke diaka ve, na yawu mu ke sala nswalu samu na kumanisa ntangu yayi, na mwa ntangu fioti.

Mu zola tuba yayi samu na kumanisa. Na ntangu mosi mu vwandaka na mbandu ya mbote ya kufwanana na yayi.

Mu vwandaka sala lukengu. Mpe bantu mingi awa . . . Kuna na Georgetown, kuna na Milltown, kuna vwandaka na ntangu me luta, ntama kuna na bamongo, kiziba mosi. Yawu vwandaka dizanga ya masa mosi ya kisina. Yawu vwandaka losa masa na ba pied yiya to tanu [1.20m to 1.50m], yina vwandaka basika konso ntangu, mpe kiziba mosi ya nene vwandaka pene-pene kuna. Mpe pene-pene kuna vwandaka bifelele mingi, beno zaba, mpe bima mingi vwandaka basika kuna, menti yina kuna. Mpe, oh, mu vwandaka na nsatu ya kukuma kuna, oh, la la, samu na kukuma na kiziba yina. Mpe mu vwandaka pene-pene ya yawu mpe nwaka mpe nwaka, mpe vwandaka mpe nwaka, mpe mu vingilaka.

Mpe mvula na manima ya mvula mu vwandaka vutuka na kiziba yina. Yawu me sukisaka ata fioti ve na kubasika, na hiver to na éte. Bawu lunga kangamisa yawu na madidi ve. Beno lunga kangamisa na madidi ve dizanga ya masa ya kisina. Oh, ve! Oh, ve! Mu ke tala ve yinki mutindu—yinki mutindu madidi kele, yawu ke kangamisa yawu na madidi ve. Beno ke kangamisa na madidi dibulu ya masa; mwa madidi ya fioti lunga sala yawu. Beno me mona?

Kasi konso kima yina ke tambula, kele na Luzingu na kati ya yawu, yawu ke tambulaka. Mpe beno lunga kangamisa na madidi ve Dizanga ya masa ya kisina. Ata yinki mutindu kulemba ya mpeve ke kisika yina, Dizanga ya masa yayi ke ntangu nionso na luzingu. Beno zinga na Dizanga ya masa yina.

¹³⁷ Mpe mu bakulaka kuna, mu lutaka kuna mpe mu nwaka kuna, mpe, oh, la la, masa ya madidi kaka! Beno ke vwanda na boma ve, “Mu ke kukiyufula, kana mu kwenda kuna, mu ke kukiyufula kana yawu ke basika diaka ve?” Yawu ke basika kaka . . .

¹³⁸ Fermier mosi ya nkulu tubaka na munu, yandi tubaka, “Nkooko ya munu kunwaka yawu.” Mpe yandi tubaka, “Yawu me kulumukaka ve to kima mosi ve. Yawu ke kaka dizanga ya masa mosi yina, yawu ke basika mpe ke kota kuna na Nzadi Bleu.”

¹³⁹ Mu banzaka, “Oh, la la, yinki kisika yina ya masa ya kitoko!” Mu vwandaka tambula na mile mosi [1.60 kilometre], tii na kisika yina, samu yawu vwandaka kisika ya kunwa masa ya mbote. Oh, mbala yikwa masa yina vwandaka mbote! Oh, la la!

Mu me—mu me kuma kuna ntoto ya kuyuma, na Arizona na ntangu yayi, mu ke banzaka yawu kaka, “Dizanga ya masa yina ya kitoko kuna, kana mu lungaka lala kuna!”

Mutindu David tubaka na ntangu mosi, “Oh, kana mu lunga nwa diaka na dizanga ya masa yina!” Kana mu lunga kwenda diaka kuna!

¹⁴⁰ Mpe mu vwandaka kuna kilumbu mosi, mpe kima mosi ya ngitukulu salaminaka munu. Mpe mu tubaka, “Yinki ke salaka

ti nge vwanda na kiese ntangu nionso? Mu zola vwanda na kiese mutindu yina. Samu na yinki, mu me monaka nge ntete ve na kiadi, kubanda mu ke kwisaka awa. Kele na kima mosi ya kiadi na nge ve.” Mu tubaka, “Nge ke kaka ya kifuluka na kiese. Nge ke pamuka na zulu mpe ke toka mpe ke yangalala. Na hiver to na été, madidi to mwini, yawu vwanda nionso yina, nge ke vwandaka kaka ya kifuluka na kiese. Yinki ke salaka ti nge . . . ? Yinki, yinki yawu kele? Samu mu ke nwa masa ya nge?”

“Ve.”

Mu tubaka, “Mbote, mbala yankaka samu ba lapin ke nwaka masa ya nge, mpe nge ke zolaka yawu mingi.”

“Ve.”

Mu tubaka, “Mbote, yinki ke salaka ti nge toka mutindu yina? Yinki ke salaka ti nge vwanda na kiese mingi? Yinki ke salaka ti nge vwanda ya kifuluka na kiese?” Mu tubaka, “Ya ke samu ti—ti bandeke ke nwaka masa ya nge?”

“Ve.”

“Samu mu ke nwaka masa ya nge?”

“Ve.”

Mu tubaka, “Mbote, yinki ke salaka ti nge vwanda ya kifuluka na kiese?”

¹⁴¹ Mpe kana dizanga ya masa yina lungaka vutula mvutu na munu, yandi lendaka tuba mutindu yayi: “Mpangi Branham, yawu kele ve samu nge nwa; mu ke sepela na yina, mpe samu mu lunga pesa masa na bandeke. Mu ke pesa masa na konso muntu yina me zola. Kima mosi kaka nge fwana sala kele kukwisa awa mpe kunwa. Kasi, yina ke sala ti mu vwanda na kiese, yawu kele ve samu mu ke toka, ya ke kima mosi na kati ya munu, yina ke pusa munu. Ya ke kima mosi ke toka na kati ya munu.”

¹⁴² Mpe yawu ke mutindu yina na luzingu yina me fuluka na Mpeve. Mutindu Yesu tubaka, Yandi vwandaka na . . . Beno me mona, Yandi me pesa beno mazanga ya masa yina ke kulumuka tii na Luzingu ya kukonda nsuka, dizanga ya masa ya kisina, ya kifuluka mpe ke basika ntangu nionso. Ata bantu yankaka na kati ya dibuundu ke mata mpe ke kulumuka, nge ke bikala kaka na Dizanga ya masa yina.

Samu na yinki beno ke baka systeme ya nkulu ya denomination mpe dibulu ya masa mosi, yina me fuluka na baparaziti mpe nionso yina, mpe kunwa bima ya mvindu, na ntangu ba me bokila beno na kukwisa na Kiziba, Dizanga ya masa ya kisina?

¹⁴³ Mu ke banza mutindu yawu ke pusa, mpe ke yangalala, mpe—mpe ke boka, ke seka, ke sepela, ke pamuka, mpe ke sakana. Madidi, mvula; mwini, kuyuma, na ntangu bayankaka na kati ya yinsi kuyumaka, yawu vwandaka toka kaka mutindu

yawu vwandaka sala ntangu nionso. Samu ya vwandaka na bansimbulu na mudindu, ya kudinda mingi, na kati ya matadi sika wapi yandi basikaka.

¹⁴⁴ Oh, bika mu zinga pene-pene ya Dizanga ya masa yina ke toka ntangu nionso! Beno baka ba systeme ya beno nionso yina me salama na maboko ya bantu, mazanga ya beno ya masa ya nkulu, kasi beno bika mu kwisa na . . . to na mabulu ya masa. Kasi, beno bika ti mu kwisa na Kiziba yayi, beno bika ti mu kwisa kuna sika wapi Yandi ke ya kufuluka. Yandi ke Kiese ya munu. Yandi ke Nsemo ya munu. Yandi ke—Yandi ke Ngolo ya munu. Yandi ke Masa ya munu. Yandi ke Luzingu ya munu. Yandi ke Munganga ya munu. Yandi ke Mvulusi ya munu. Yandi ke Ntinu ya munu. Mu ke zwa na Yandi yina nionso mu ke na yawu nsatu. Samu na yinki mu lenda kwenda na kima yankaka?

¹⁴⁵ Mpangi-bakala, mpangi-kento, na nkokila yayi beno zola kwisa ve na Kiziba yayi? Beno zola ve, kana beno me kwisaka ntete ve, beno zola ndima Yandi ve na nkokila yayi na ntangu beto ke kulumusa bayintu ya beto?

¹⁴⁶ Mabulu ya masa ya kutobuka, ke basisa masa, ke nokisa masa, yinza ke kota na yawu na malembe, mvindu ya bidikilu mpe ya bilumbu me luta. Samu na yinki ve Dizanga ya masa yayi, sika wapi bima ya mutindu yayi lungaka vwanda ve, Kiziba yayi ya nene ya kufuluka na Menga, yina me basika na misisa ya Emmanuel? Samu na yinki beno zola ndima yawu ve na nkokila yayi? Bika ti Nzambi kusadisa beno na nkokila yayi, na ntoto yayi ya kuyuma, mpe na nsatu ya masa. Mutindu profete tubaka, “Yandi ke Ditadi na ntoto ya kuyuma.” Yandi ke Kiziba yina. Beno zola kwisa na Yandi ve na nkokila yayi, na kati ya bantima ya beno, na ntangu beto ke sambila?

¹⁴⁷ Tata ya Mazulu ya Luzolo, kele na Kiziba yankaka ve, mutindu musiki ke bula, “Mu zaba yinto yankaka ve; kasi kaka Menga ya Yesu.” Mu butukaka kuna, mu yelaka kuna; mu zola zinga kuna, mpe kufwa kuna, mpe kuvumbuka diaka kuna na lufwa, na Ntwala ya Yandi. Ntangu nionso, Mfumu, bika mu vwanda na Ntwala ya Yandi, samu mu zaba yankaka ve. Credo mosi ve, zola mosi ve; zola mosi ve kasi Klisto, credo mosi ve kasi Klisto, buku mosi ve kasi Biblia, kima yankaka ve, kiese kele ve na nganda ya Yandi. Kukatula Yandi na munu, O Nzambi, mu ke tala ve yina yinza ke na yawu, ya—ya ke vwanda lufwa, mu ke yenga-yenga nkatu kikuma na maboko ya munu na zulu ya yintu. Kukatula Yandi na munu, yimeni samu na munu, Mfumu. Kasi bika Yandi vwanda na kati ya munu, na ntangu beto ke na Ngonda ya kumi na zole mutindu beto ke na Ngonda ya tanu, na yawu ke vwanda ve na bisika ya mwini mpe bisika ya kuyuma, ata ti lufwa yawu mosi ke vwanda na lunungu ve. Bika beto vwanda na Yandi, Tata. Pesa Yandi, na mutindu ya mingi, na konso mukwikidi na nkokila yayi awa, mutindu bawu ke vingila na kati ya yinzo yayi.

148 Mingi kati ya bawu ke tambula na matoma na nkokila yayi, samu na kuvutuka na bayinzo ya bawu, mpe bika ti yayi kuvwanda dibanza ya bawu, “Mu ke zinga na Kiziba yina. Mu ke zinga kuna, mpe ke nwa masa ya madidi, konso ntangu.”

149 Mpe kana bawu me ndimaka yina, ntete ve, bika bawu ndima Yandi na ntangu yayi, na yawu bawu lunga kwenda na Kiziba kumosi na bawu. “Mu ke fidisa beno; Mu ke vwanda na beno tii na nsuka ya yinza.” Pesa bima yayi, Tata.

150 Mpe ntangu yayi mutindu beto me kulumusa bayintu ya beto, kele na muntu mosi awa, na nkokila yayi, to yikwa lenda tuba, “Mfumu, nata munu na Kiziba yina na ntangu yayi. Mu me kwisa awa ve samu na kuwa kaka; mu me kwisa awa samu na kuzwa Kima mosi. Mu me kwisa awa samu na kumona Nge, Mfumu. Mu ke na mfunu ya Nge na nkokila yayi. Kwisa na ntima ya munu na ntangu yayi. Nge ke sala yawu, Mfumu?” Nzambi sakumuna nge. Mfumu sakumuna mosi na mosi ya beno.

151 Tata, Nge me mona maboko, na zulu mpe pene-pene ya bikaku, mpe na bayinzo yankaka, na nganda. Nge—Nge me mona yawu, Tata. Mu—mu ke sambila ti Nge ke pesa konso kima yina ba ke na yawu nsatu. Mbala yankaka bawu nwaka na dibulu ya masa ya nkulu, Mfumu, mwa nkakalakani ya nzila sika wapi muntu mosi timunaka dibulu mosi ya masa, yawu me kuma na mikolobo na malongi ya mutindu na mutindu, yina ke manga Ndinga. Mu ke sambila, Nzambi, ti na nkokila yayi bawu ke kwisa na Yandi Yina ke Kiziba yina, Kiziba yina ya Luzingu. Pesa yawu, Tata. Mu ke pesa bawu na Nge na ntangu yayi na Nkumbu ya Yesu.

152 Mpe Nge tubaka na munu, “Kana beno lomba konso kima yina na Nkumbu ya Nge, yawu ke salama.” Ntangu yayi, mu lungaka lomba yayi ve, Mfumu, kana mu banzaka ve ti yawu lenda salama. Mu ke—mu ke tuba yawu kaka na kikalulu. Kasi mu ke sambila samu na bawu, na ntima ya kieleka. Mu ke sambila samu na bawu, mpe mu ke kwikila ti Nge ke pesa yina Nge silaka.

153 Mpe ntangu yayi mu ke nata bawu ntama ya dibulu ya masa yina na nkokila yayi. Mu ke nata bawu ntama ya kisika yina bawu vwandaka kunwa, sika wapi bawu vwandaka na kiese ve; tii na Kiziba yayi. Mu ke sala yawu na Nkumbu ya Yesu Klisto.

154 Bawu ke ya Nge, Mfumu. Bika bawu nwa na Nge, Masa ya moyo, Kiziba ya Masa ya moyo. Na Nkumbu ya Yesu, mu ke lomba yawu. Amen. Pesa yawu, Mfumu.

Oh, yinto ya kitoko
Yina ke sukula munu mpembe mutindu mvula
mpembe;
Mu zaba yinto yankaka ve,
Kaka Menga ya Yesu.

Yinki lunga sukula masumu ya munu?
 Kaka Menga ya Yesu;
 Yinki lunga sungika munu diaka?
 Kaka Menga ya Yesu.
 Oh, . . .

Yesu, belusa bantu yayi, Mfumu! Pesa yawu, Mfumu, na Nkumbu ya Yesu. Mu ke sambila, Nzambi, ti Nge . . .? . . . Nge zaba nionso.

Mu zaba yinto yankaka ve,
 Oh, kaka Menga ya . . .

¹⁵⁵ Beno banza samu na yawu, ti mu zaba yinto yankaka ve! Mu zaba kima yankaka ve kasi Yandi. Mu zola zaba kima yankaka ve kasi Yandi. Kaka Menga ya Yesu! Oh!

Oh, yinto ya kitoko
 Yina ke sukula munu mpembe mutindu mvula
 mpembe;
 Mu zaba yinto yankaka ve,
 Oh, kaka Menga ya Yesu.

¹⁵⁶ Na ntangu beto ke yimbila yawu diaka, beto pesana mbote mosi na yankaka. Beno ke zolana mosi na yankaka? Kele na muntu mosi awa yina ke na diambu na muntu yankaka? Kana yandi kele, kwenda sungika yawu. Beno ke sala yawu? Beno katuka awa ve mutindu yina. Beno me mona? Kana beno ke na diambu na konso muntu yina, beno kwenda sungika yawu, kaka na ntangu yayi. Yayi ke ntangu ya beno ya mbote na kukwenda kuna, mpe tuba, “Mpangi-bakala, mpangi-kento, mu tubaka kima mosi samu na nge, mu banzaka kima mosi samu na nge. Mu lendaka tuba mutindu yina ve. Lemvokila munu.” Beno me mona, yina ke mutindu ya kusala yawu. Beto vwanda na Kiziba na kati ya beto, ntangu nionso. Beno me mona?

Mu zaba yinto yankaka ve,
 Kaka Menga ya Yesu.
 Oh, yinto ya kitoko
 Yina ke sukula munu mpembe mutindu mvula
 mpembe;
 Oh, mu zaba yinto yankaka ve,
 Kaka Menga ya Yesu.

¹⁵⁷ Oh, Yandi ke mbote mingi ve? Kiziba yankaka ve! Beto ke baka sambukila ya bima yankaka ve. Beto me kabwanaka, beto me bikaka yinza na manima ya beto. Beto zola diaka ve ayi ya Egypte mpe mabulu ya masa ya kutobuka. Beto ke na nzietelo na Mfumu Yesu, yina ke Ditadi yina ba me bula, amen, beto ke dia Mana ya Zulu, mpe beto ke nwa; beto ke dia Madia ya bawanzio, mpe beto ke nwa na Ditadi. Amen!

Mu zaba yinto yankaka ve,
 Kaka Menga ya Yesu.

Ntangu yayi beto kulumusa bayintu ya beto.

¹⁵⁸ Mu ke sambila ti Nzambi kusakumuna mingi mosi na mosi ya beno, ti lemvo mpe mawa ya Yandi kuvwanda na beno na sabala ke kwisa. Mpe kana kima mosi kusalama, ti mosi ya beno kuluta na simu yina yankaka ya vwale na ntangu yayi, beno bambuka kaka ti yina ke mwa bangunga fioti ya mpongi mpe ya kupema tii kuna beto ke kutana. Beno bambuka moyo, ti, “Bayina ke vwanda na moyo mpe ke bikala ke vwanda ve na mantwala ya bayina kufwaka, samu Mpungi ya Nzambi, Mpungi yina ya nsuka. . .” Sambanu me bulaka ntete. Mpe Mpungi yina ya nsuka, mutindu Kinieminu ya nsuka, ke vwanda Kwizulu ya Mfumu. “Yawu ke bula, mpe bayina fwaka kati na Klisto ke vumbuka ntete na lufwa.” Bawu ke pema kaka tii na ntangu yina.

¹⁵⁹ Mpe kana bawu lwadisa ntima ya beno, beno bambuka moyo:

Baka Nkumbu ya Yesu,
Mutindu kinwaninu ya ngolo;
Mpe na ntangu mpukumunu ke kwisa,
Niunguta na kisambu Nkumbu yina ya santu.
(Bampeve ya yimbi ke tina ntama.)

¹⁶⁰ Beno bambuka moyo ti, beto ke na kivuvu ya kukutana awa na suka ya Lumingu ke kwisa. Beno nata bambevo mpe bantu yina ke na mpasi. Mu ke sambila samu na beno. Ntangu yayi beno sambila samu na munu. Beno ke sala yawu? Beno tuba, “Amen.” [Dibuundu me tuba, “Amen.”—Mu.] Mu ke sambila samu na beno, ti Nzambi sakumuna beno.

. . . Nkumbu na bisambu.

Nkumbu ya kitoko, Nkumbu ya kitoko, Oh ya kulembama!

Kivuvu ya ntoto mpe kiese ya Zulu;
Nkumbu ya kitoko, Oh ya kulembama!
Kivuvu ya ntoto mpe kiese ya Zulu.

Beto ke fukimina Nkumbu ya Yesu,
Beto ke fukama na makulu ya Yandi,
Na Zulu beto ke lwatisa Yandi yimpu ya
kimfumu Ntinu ya bantinu,
Na ntangu nzietelo ya beto ke kuma na nsuka.

Nkumbu ya kitoko, Nkumbu ya kitoko, (ya ke
ya kulembama mpe ya kitoko ve?)

Kivuvu ya ntoto mpe kiese ya Zulu;
Nkumbu ya kitoko, Nkumbu ya kitoko, Oh ya
kulembama!

Kivuvu ya ntoto mpe kiese ya Zulu.

¹⁶¹ Ya ke vwandaka ntangu nionso mpasi mingi na kubika beno. Ata mu zaba ti ya ke sala beno mpasi, kasi kele na kima mosi

kaka samu na . . . Beto ke, baka diaka nzila ya kima mosi, beno zola yawu? [Dibuundu me tuba, “Amen.”—Mu.] Beno ke sala yawu? *Nsinga Ya Ngwisani Kusakumuka*, mpangi-kento. Yikwa kuzaba mukunga yayi ya nkulu? Bamvula mingi me luta, beto vwandaka yimbila yawu.

¹⁶² Mpe mu vwandaka banza, na nkokila yayi, ti “maboko zole, na kati ya bankama, yina me bikala,” na ntangu beto vwandaka yimbila mukunga yina kuna na tabernacle, mpe beto simbanaka na maboko bamosi na bayankaka. *Nsinga Ya Ngwisani Kusakumuka*. Mu me zika mingi kati ya bawu, kaka awa na maziame. Bawu ke vingila. Mu ke mona bawu diaka. Mu ke monaka bawu, ntangu nionso, na vision, na ntangu mu ke talaka na simu yina yankaka ya vwale. Bawu ke kuna.

Ntangu yayi beto kulumusa bayinto ya beto mutindu beto ke yimbila.


Nsinga ya ngwisani kusakumuka
Yina ke vukisa beto na Klisto;
Zola . . .
Mutindu yina ya Zulu.
Na ntangu beto . . .

Ntangu yayi beno tanda maboko samu na kubaka diboko ya muntu yankaka.

. . . ntama mingi ve,

Ntangu yayi beto kulumusa bayintu ya beto.

Ya ke pesa beto mpasi na ntima;
Kasi beto ke vwanda kintwadi na kati ya
ntima,
Mpe na kivuvu ti beto ke monana diaka.

¹⁶³ Mutindu beto me kulumusa bayintu ya beto. Ntangu yayi mu ke vutula kisalu na pasteur, mpe yandi manisa na . . . 

MABULU YA MASA YA KUTOBUKA KNG64-0726E

(Broken Cisterns)

Nsangu yayi ya Mpangi William Marrion Branham, kulongamaka na Kingelesi, na nokila ya Lumingu, na kilumbu ya 26 ya Ngonda ya Sambwadi, na mvula 1964, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2019 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org